

田間尺牘

田間尺牘卷一

桐城錢秉鐙飲光著

龍溪源室主校刊

寄汪辰初

滄桑之後。遲暮之年。我兩人重得聚首。世所希有。子美詩相對如夢寐。豈足以喻此情事乎。前秋八月。與徐果亭聯舟到真州。果亭有事入揚。便欲奉晤。弟附去數行。並大集敘文一篇。小詩二首。想已寄到。今又三載矣。屈指年兄已八十有六。膚色潤澤。神明湛然。是百歲已上人也。弟今年七十五。齒髮益衰。心血全枯。但意興猶在耳。生計困頓。其貧不減年兄。加以兒孫輭弱。合門三十餘口。嗷嗷待哺於老夫。未能忘情。置之不問。牛馬償何時始了。言之慨歎。倘體中猶健。尙擬作京口之游。便過揚州。重叩丈室。亦未可知。白髮餘年。千里頻往。傳之後人。當是一段佳話也。因宗鶴老便附起居。鶴老司鐸貴池。與弟往來。交好甚密。言及先生。誦服不置。蓋今之古人也。想當晤悉近狀。不多及。

與葉映榴

弟以戒得之年。風塵奔走。俗腸攪擾。詩思索然。無怪見大巫而氣盡也。前承虛懷忘勢。邀集署齋。恕其衰殘。縱其狂談。誠知醉後語尤顛。亦見老夫傾倒於先生者至矣。一時坐上。盡屬同聲。諸君子應有佳篇。以紀盛事。弟亦漫呈口號二章。未經點定。忽失其稿。追思累日。了不記憶。平生疎放。此其概矣。頃偶得之舍親張別駕署中。欣逢故物。不計其詞之工拙。率爾錄上。惟先生有以教之。直寫情事。聲病甚多。勿以弟老耄而吝指南也。歲晚江寒。難理歸棹。已擬度歲於關遠堂中。不知清宴之暇。尙獲造膝一奉德音否。念之念之。臨楮依切。

與張壽民

玉峯別後。奄忽三載。老臥江邨。莫通問訊。得果亭手札。始知榮任漢陽。曷勝忻慰。此地素號衝繁。人情曠悍。而老年翁一以潔已省事爲治。未期月而仁惠廉幹之聲洋溢江漢。晤龔道台。稱賀循良。爲全楚第一人。屬在故舊。喜可知也。僕今年七十五矣。窮苦自甘。而爲飢寒僨負所驅。遠來託鉢。誠萬不得已也。頃已抵鄂渚。舟楫勞頓。欲得少休息。方能渡江。先此奉聞。不一。

又

陰雨淹時。今晨始睹日色。卽擬造謁。惟兩岸泥濘。未能問渡也。四之日。襍被過江。可作數日快聚。得一容膝地。密邇琴堂。以便時時過從。如何。小詩三首呈教。循聲冰響。采諸口碑。不敢溢美。而不佞平生之期望。衰暮之鄙私。情見乎辭矣。一笑一笑。山葵一封。六茗一簍。莢莢之誼。皆敝鄉土物。以當千里鵲毛。唯莞存之前命小兒問齋名。作一引首奉贈。未蒙賜教。以意撰數字。未知有當否。特呈覽。卽擲下付鐫爲荷。

與某

憶在南宮臥疾。時荷顧我榻前。殷勤慰問。關情骨肉。感戢肺腑。今又十二年矣。先生道履當益佳勝。弟則窮老無狀。乃以飢驅。重過鄂渚。遙望晴川。卽擬飛度。握手追歡。先生年踰七十。弟已七十五矣。天涯兄弟。白首抗談。此樂何如。舟楫積勞。疲乏已甚。暫爲龔舍親留住。俟少休息。過江訪張明府。當得與先生傾倒十餘年積懷也。

與家紹隆

都門聚首。誼敦同氣。而昆仲以僕馬齒叨長故國。遺民宗盟之中。彌加殷篤。臨歧珍

重感哉。不忘回首。十有四年矣。老臥江邨。見聞都廢。晤果亭。始知榮任所在。蜀江萬里。雁字莫達。枕被之往。付諸西堂之夢而已。昨在龔世兄署中。得覩名刺。始知以卓異行取名在梧垣柏府之班。曷勝欣慰。僕今年七十五矣。力疾扶衰。以赴千谷之約。竊不意料於此中獲逢大弟。喜極欲狂。先遣小兒渡江。祇謁少訴積懷。如未即長發。正可從容暢叙也。臨楮依戀不一。

與李醒齋

振裕

都門奉別。兩更寒暑。伏惟主眷益隆。譽望益重。天卿累晉。旦晚端揆。額手稱慶。不第嗜昔故人也。弟以剡闕之役。去夏即抵吳門。易學詩學。莊屈合話。併拙集文稿。次第梓成。皆祖臺先生汲揚懲愆之力也。未梓者。尚有詩稿三十卷。及他藏山稿二十卷。雖幸東海已歸。事不可輟。然卷帙浩汗。合尖之功。終不能無望於知己之助耳。向蒙賜安池兩函。相見時極有口惠。竟未邀涓滴之潤。大約晚守鄙吝。有取無與。池守依例以行。以致大虛台意。聞池守尙歉然未已。倘更得祖臺數行。申致前說。或可小邀飲助。以了此局。亦祖臺意中未了事也。如何如何。因敝宗姪大鏞入都之便。輒附拙

刻二稜。展其面。呈大端。保故實。通廣文。後塲之子。珍向極蒙青盼。廢疾時發。膏肓照拂。合門叩感。既以死職從祀。一貧如洗。大難以筆墨依人。頗有才藻。頃肄業成均。思得叩謁庭塔。望見顏色。惟祖臺念故舊之誼。進而教之。併悉弟近狀也。道遠卷繁。拙刻俟陸續寄上。統惟台教。率附草草。希鑒萬一。

與張敦復

都門別後。裘葛再更。天上故人。音問杳然。到吳門。晤吳天。況言於舊春。蹕次乍見。道體益豐。道念益定。可喜也。司空命下。雖未滿興望。然以六卿晉陟揆輔。直指日事耳。部務雖勞。較之內廷。或少餘暇。然仰度高懷。爲東海立翁之勤。劬於綸閣。不若爲健翁之著作於東山也。時節因緣。自有定分。正未可強耳。弟以刻書之役。久羈吳地。拙集凡六種。卷帙浩繁。梓費莫繼。恐未能告成。亦將言歸。以其事付之東海一門可也。詩學借重弁言。蜀漢代爲屬筆。寵施多矣。謹寄呈大教。又拙刻詩稿。尙未有序。欲乞真定公數語。未敢冒昧上懇。先生能爲轉請乎。倘獲所請。即便郵至吳門梓行。如何。至禱至禱。向蒙直定。賜有兩函。皆值去任未投。頃以原函寄上。託爲繳還。爲致感謝。

萬萬。儉近地知交。有可與言者。便致數行。以成合尖之功。公之惠也。尚臣兄未另候。向亦承江都一函。併繳上不一。率爾附寄。不莊希鑒。

與家紹隆

憶丙寅之冬。訪舊鄂渚。值行旌正駐漢口。比因衰病畏風。命兒子渡江奉調。極承家人之誼。進而教之。旣面悉種種。兼荷藥物之惠。銘戢無已。已卯冬。因姪某公車之役。便赴都下。故人之招。自春涉秋。日望車騎。早到。聚首一話。十六年來風雨之思。久之不至。臨發。乃於總憲座中。聞諸越江太史。知已下車。弟未識居停所在。未及覓晤。比向當事掄揚。萬一誠有不容自己者。不足爲左右道也。頃在吳門。較訂拙集。授梓。將及一年。得梧垣之報。喜而欲狂。一時言路。吾宗頓有三人。旣爲朝廷慶得士。亦爲吾宗快多才也。拙集六種。甫刻其四。卷帙浩繁。資費不貲。正不知告成何日。先以文稿付宗姪大錦。面呈大教。錦亦吾家佳子弟。頗有才筆。依人北上。肄業成均。特屬其叩謁階下。面悉衰腐近狀。惟一切照拂之爲荷。恃在同氣。草率不莊。鑒念不一。

與張愷似

都門別後。再易寒暑。天上故人。時勞夢寐。未敢以草茅衰朽自外於氣誼也。比聞體中少有所苦。嗣晤寄亭。知已勿藥。欣慰欣慰。老年兄精神才思。爲當今第一人。誠恐用之太過。務期寶畜收斂。爲斯世珍重也。如何如何。弟以剗蒯之役。久羈吳門。拙集六種。甫刻其四。資費不繼。將欲歇手矣。幸東海公歸。或猶可籌畫以告成也。向承貴房師胡先生賜函。介紹藩台。值其離任未投。謹以原函繳上。業心荷高誼矣。致謝萬萬。小兒向荷誨愛。每翹首雲霄。輒爲忡舞。舊春曾附一函。道其積悃。未知曾達。掌記否。拙集文稿一部。付敝宗姪禹銘。屬爲面呈。刷印既少。攜帶甚難。不能全奉。幸鑒之。禹名大錦。吳人。極有才筆。頃依人入都。將肄業成均。唯不吝齒頰爲荷。草附不文。惟宥萬一。

與稽爾遐

留滯吳門。再易裘葛。久疏音問。先生亦不意我尚在此間也。去冬有負尊委。代弟受怨。慚仄何如。頃梓事已畢。於六種中。已刻其五。梓費不繼。留蛺異日。採幽好事之人。以充秘笈可也。書旣成。客囊且罄。不能印行。千求無路。開口甚難。向承貴邑父母數

賜殷勤。雖未沾河潤。然雅意已心悉矣。合尖之功。所需無幾。不得不仰衆擎之一助也。數日內。即擬買舟造訪。極知冰蘖難以解贈。惟是無碍之情。不費之惠。有可爲之地者。望先生勸使者多方圖之。弟到即可拜德。不令久羈客舍。則當事之涓滴。皆先生之惠賜也。特在知我。專此奉託。唯豫圖之。月後定可握手。懇切懇切。便附草草希鑒。

與姜在湄

鄂渚一握。未罄離緒。比欲再聆色笑。而鵲首已北渡矣。曷勝惘然。汗漫都門。遂歷一載甫歸。值令子遠省邦上。附去數行。應已呈覽。僕今年七十九矣。老態日增。餘生可見。老世翁前程方邁。宦轍無涯。後會何期。徒深感歎。以刻畫之役。留滯吳門。再易寒暑。所刻田間易學詩學莊屈合話併詩文二集。合得五種。所費不資。先代許多關係文字。俱未及刻。以俟後來闡幽耳。寄詩文二集。聊致遠懷。政事之暇。或可一娛目。如見故人乎。生平浪迹。半天下。獨未入秦關。尋古人遺蹟。憑吊詠歌。亦詩題中六闕。陷事也。今老矣。歎恨如何。涇州守傅蓬仙。名登瀛。意氣如雲。臨好文事。與僕舊稱莫逆。

今在屬下。知老世翁共事。必有水乳之投。呼應周旋。不待僕之饒舌也。附去一函。少敘闊私。便爲郵致。面時道及拳拳。拙集莫由遠寄。其中舊多酬贈之作。亦爲示知。以見僕之未敢忘也。固原守吳茂孫。同事天末。復聚首燕臺。頗極綢繆。因其宦後邈然。不及通問。相見亦乞致鄙私。終是忠難。故人不能去。諸懷耳。吳門徐長民。以然諾俠氣。爲仇者所陷。遠戍臨洮。知交爭惜之。蒙執事多所照拂。不啻合門。啣感亦與僕有交。更乞推分留意焉。今其仲子大純。遠來省親。便附起居。大純字質愚。爲山東姜奉世壻。如須先生孫壻也。進禮之爲望。草率希鑒不一。

與傅蓬仙

憶壬子初冬。新城逆旅。訪舊墩外。值年台擁膝獨坐。看壁上所懸詩。是拙句也。弟推扉而入。一見驚喜。如在夢寐。登床絮語。晚食始回。一時情事。至今念之。不能忘也。乙卯季春。有大梁之遊。甫至繁臺。聞台駕去汴。未及旬日。舍親方邵村言。相見時。輒口弟不置。以我之念君。固知君之必念我耳。差之旬時。失之良晤。曷勝歎惋。丁戌之間。都下故人。謀爲拙集授梓。邀致北上。歷年始歸。隨到吳門。有事劄牘。生平著作。刻其

三分之一。資斧不繼。暫爾輟工。留滯年餘。今且返故山矣。舍親江嘉齋。駐節涇原。得與老年台共事。朝夕藉教。水乳之契。相得可知。固不俟弟爲作合。弟亦自（下缺）

與王某

（上缺）知不能已於言也。政事日新。推遷在即。倘得福曜惠臨南土。尚可一望清光。弟明年八十矣。白頭扶杖。猶能跂足以俟。回思十三年前。汾湖聚首。十七年前。青箱高會。音欸色笑。宛然如前。舊游凋謝。一老僅存。相公篤孝思而益深友誼。凡屬同人。爭相嗟歎。不獨一老感泣也。別論自當遙悉。倘邀鈞惠。明歲得成此書。俾數十年心血。得以流傳。即死且不朽。豈區區尋常解贈之誼。得以比隆哉。謹九叩以謝。束裝恩迫。臨行踵叩。面頰不旣。

與王忍亭

去歲敝鄉張教老入都。附寄一函。託其令郎卣臣轉達。至今不得卣臣報章。不知此書曾入掌記否。一別十三載。或老世翁竟忘却此老耶。草野疏賤。本自使人易忘耳。今夏以鈔拙集入城。晤程太常令郎松皋。是伯兄相國年家子也。言侍坐之餘。時蒙

垂。野。深。居。感。激。讀。青。箱。堂。遺。稿。追。憶。曠。昔。不。禁。泣。然。又。載。摭。序。於。前。是。爾。時。據。鞍。索。筆。所。成。殊。慚。草。率。中。有。何。時。白。髮。之。叟。重。上。青。箱。之。堂。等。語。叟。字。作。翁。字。失。叶。平。仄。應。是。忙。中。落。筆。錯。耳。希。爲。改。正。之。弟。今。年。七。十。五。矣。餘。生。有。限。後。會。無。期。一。生。心。血。惟。存。著。述。數。種。向。者。易。學。蒙。太。翁。先。生。既。鈔。存。鄴。架。初。擬。致。中。州。藩。臺。爲。之。授。梓。因。弟。遠。歸。托。徐。方。老。止。之。今。其。書。爲。敝。鄉。常。事。取。去。梓。與。不。梓。尙。未。可。知。而。弟。此。外。尙。有。詩。學。莊。騷。合。話。諸。雜。著。其。詩。文。未。刻。稿。甚。多。不。趁。喘。息。尙。存。故。人。當。路。爲。之。流。布。委。諸。破。麓。鹿。煤。留。覆。酒。甌。寧。不。惜。乎。藩。台。儼。然。開。府。武。林。梓。人。輻。輳。事。等。吹。灰。相。國。尙。有。前。言。在。意。中。乎。但。得。一。種。傳。足。以。不。朽。惟。世。翁。宴。閒。之。暇。偶。一。及。之。未。敢。以。野。人。妄。相。干。瀆。也。潤。州。公。祖。訊。曾。爲。致。鄙。私。否。把。手。嬉。笑。如。昨。日。寧。以。貴。而。忘。之。明。春。俟。文。衡。試。事。畢。謁。謝。江。陰。取。道。京。口。便。趨。鈴。閣。知。不。拒。之。門。外。也。因。舍。親。方。絃。長。之。便。輒。附。數。行。絃。長。爲。密。之。先。生。家。孫。久。客。都。門。時。可。晤。言。倘。有。德。音。付。寄。即。可。至。也。懇。切。懇。切。

與王子喜

虎邱聚首。大暢客懷。別後因拙集告成。百費全集。展布無從。苦甚苦甚。故鄉荒旱。頻仍。家訊促歸。此中梓費不給。未免多有稱貸。豈能逃責而去。以是羈滯至今。又見吳江楓落矣。準擬望後理棹。東海相公復欲約至玉峰。爲數日之聚。大約不出月內。當從老祖台踐金焦之約也。晤之在即。不多及。

與韓元少

乍寒益動歸思。望後往玉峰。別果立二公。返棹卽趨洞庭。與健翁言別。所許大札數幀。乘暇一揮。卽覓紙奉上。狄立人文序。留案頭轉致之。有小文冊。爲健翁初度用。尊處有熟健筆。幸賜用爲荷。懇懇。

與任克家

都門分袂。遂踰一紀。契闊之懷。可勝絮語。而台兄官履益佳。治聲益著。弟雖落拓。方外亦復久視。人間彼此相念。良足慰也。向吳燕公入三河幕時。記致數函。臨行專遣奉寄一書。莫中鄙悃。前歲楊嘉樹赴燕臺之招。取道貴治。託其面致寸函。併有寄懷詩奉正。乃嘉樹忽由白門改從東路。又致浮沈鬱積如何。伏處窮鄉。見聞都廢。頃知

治行第一業應超擢。而弟頗作磁州夢也。再經此地。風物清美。歷歷目中。但去南特遠。爲台兄計。以避故人甚妙。恐惟能避老友耳。近來人情。不怕故人天上也。即今年七十四矣。遊興已倦。衰殘困頓。不堪爲知己道。江邨閉戶。刪定生平未刻詩文。遂盈數尺。授梓無期。但得備書人。資其筆墨。襲殯抄一清本。藏之秘笈。足矣。然卽此亦無力能辦。台兄其有意存之否。昔都門臨別。不忘老友之語。至今猶銘戢五中。計不過費閣下一紙之響。而能留故人數十年之心。血諒所樂爲。家報中便致此意於諸昆仲。亦不難達也。如何如何。鎮江錢左車爲弟宗姪。係開少兄長君也。開少詩文想所熟知。舍姪本京口名士。賣藥汴城。其術甚精。名振大河南北。豪傑而君子也。倘閣下車騎入汴。往過其廬。足悉弟近況。亦得一方好友也。便附數行。託覓寄。倘不吝好音。希於家中示我。

與左霜鶴

春光又去三之二矣。想讀書課孫之暇。別無一事榮懷。老年樂志。惟四兄一人而已。弟不能閉戶而能塞耳。於追呼啼號中了得莊屈合話一書。自謂能發前人所未發。

因小兒久病。無人脫稿。末由寄覽也。悵悵。此書成。復思究心岐黃之術。無事討事。做莊子所謂以窮年也。不知何時入城。看新笋出土。爲樂。念之念之。

又

春盡。莊屈告成。喜不自禁。卽日爲浮山之遊。謂從此當捐棄筆硯。放浪山水矣。到山又有不得不應之請。歸來又爲搜索枯腸。此債何時是了也。前佳茗之惠。投以所嗜。感甚。感甚。小介云。茶盡。仍需還簍。未聞有贈珠還積者。簍不可得矣。晤孫威公。爲致意。楚書曾爲寄去否。信天翁不動脚。只望天上落下一塊肉。到口可發一笑。

與扶升姪

居家悶甚。擬由浮渡取道錢家橋。緩轡入城。正是桃花爛熳時也。惟無蹇可策。兼以舊秋有約。未蒙兄邀。雖屬漫遊。未免有攬戰之嫌。故行行且止耳。莊屈合詒。尙是草本。兒子久病未愈。無人脫稿。不便寄覽。巵千谷想念。前聞諸威公。復承玉叔傳致。當不誣也。權關阻客。行李甚艱。舟楫之資。莫知所出。亦徒荷口惠耳。耕壺覽揆。唯有大嚼竹葉亭。醉飽之餘。打油詩一首奉祝。他無可將也。聞新置一寵。欣喜欣喜。而姪婦

賢聲遠播。合門稱誦。尤可喜也。

與方田伯

突聞回祿之變。恫駭累日。百年故居。一旦焦土。吾輩束髮游譙。庭前階下。唱和如昨。忽罹此阨。能無泣然。知世兄所居獨全。然北堂受驚不小。伏望善爲安慰。累世藏書。聞屬位兄者盡燬。索伯恐亦未免零殘。年來著作無恙否。念之痛惜。便羽附致鄙私。希爲道及。

與李岷瞻

江邨春雨。小酌論文。諸謔遞作。中夜謹嗽。雖羈人不得志之所爲。亦吾黨生平聚首之樂事也。別後惘然如失。隨聞鼓棹西上。默然自傷。弟老矣。不知後會尙有期否。莊屈合話。到家始能脫稿。頗覺發前人所未發。其書可二百餘頁。猶欲更加改竄。尙未錄清也。弟亦從此捐棄筆硯。少留心血。以盡餘年。平生著作。幾盈三尺。錄清且難。況剗削乎。惟言之知己之前。使海內人知田間腐草中尙有此一點孤螢未出現也。言之浩歎。窮乏已極。勢不能不爲楚遊。俟小兒試事竣。侍行有人。方得首途。畏權關瑣。

屑。將違陸行。但輿馬之費。倍於舟楫。計皆出於稱貸。尙未有門。言志而已。爲語藩介丘。偷來時。當暫停其客舍。以俟覓廬。如何。此公屢有口訊相念。弟兄兩寄書。皆無報章。弟之扶老力疾而來。誠萬不得已也。有友人往晤。先以此意聞之。

又

平生至友。歡聚旬餘。吟詠之暇。諧謔雜出。同心之言。可謂極暢。返舍各有所失。念孤舟遠邁。後會難期。其何以爲心乎。臨當長發。尙望寄示一音。白松歌另書小幘。以便入郵函。其中少加點竄。較更疏通。總非行歌本色也。如何。

與某

去秋別後。半月始返江邨。今春了得莊屈合話。此十數年盤紆胸中之物。幸已脫稿。頗覺發前人所未發。衰病出門甚難。何時得向先生前。剪燭把杯。相與快論也。生平詩文未刻稿。卷帙甚繁。錄清且難。况剗削乎。頭白汗青。昔人所歎。弟亦從此捐棄。筆硯看山。默坐而已。幸爲留心。以俟機緣。或可旦暮遇之也。便羽附佈。統爲心炤。

與張夢敦

秋風分袂。雖未追送北關。黯然之情。較衆彌甚。老懷固如此也。別後講罷。始返江邨。又完一孫文之嫁。窮愁萬狀。不言可知。弟老矣。遠遊無地。除講經賣文外。別無生計。此豈常局耶。言之慨然。舍姪光鑾。頃以廷試入都。素蒙先生獎借。順風之吹。知所不惜。倘得一席餬口。肄業成均。造育之德。感戴何如。健老方老。皆有數行奉託。更借齒牙爲重耳。所附諸函。曾付長公。一一分致否。急欲得王忍亭載答。幸取付郵筒寄我。

與王子喜

獻歲新禧。盈庭安吉。江天在望。額手遙慶。去秋造席忽忽。僅得一面。金焦之約。徒有夢游。所託寄都門諸刻。並候相公一啓。不知已俱轉達否。因此啓書札潦草。欲取回重錄。爲閣人堅阻。不得入署。悵然而失。嗣移舟江口。欲就祖台話別。又爲榜人所紿。竟揚帆渡江而北。望見車騎在岸。無由蟻楫握手。大是恨事。弟到家便病。年中啼飢號寒。及家人交謫之聲。嗷嗷不休。以此益增其老。春雪經旬。惟有擁被堅臥耳。頃小兒有事於吳。特命叩謁。面悉近狀。惟進而教之。弟已八十。後此歲月有限。平生故人。應所垂念。老祖台宦橐如冰。豈敢忘思解贈。尙承許以郡試列荐。不致臨時有虛風。

諸便拜大惠也。楊公祖情誼殷殷。面約毋忘。見時爲致謝。並及。

與韓慕廬

去冬江天凍合時。使者道命急返。不知曾到家度歲否。貧家不能多贈舟資。深以爲念。今春風雪擁戶。衰疾轉增。惟有絮帽蒙頭。經旬堅臥。遙憶剡軒中有罇如蠶。有燭如椽。酒伴吟朋。觥籌交錯。豈知外間尙有寒威乎。念之神往。未免東向一買勇也。歲杪有人自吳門回。健翁傳語立翁病狀。爲皇皇不寧者累日。即擬力疾冒寒。扁舟趨省。惟精神大不如前。未能強出。專遣小兒前來代申下悃。並叩先生面悉近狀。惟進而教之。劉孝子傳。遵命草上。諸大篇寫事已盡。不過依樣葫蘆。未能別出機杼也。就中避地情事。從穀似兩詩中得之。輒爲補出。諒非誣耳。爲致劉年翁。更乞先生改正數行。爲荷。

與蔡九霞

花溪留滯。兩度清秋。幸近子雲之居。樂數晨夕。雖未獲時時過從。而密邇同氣。便覺羈客不孤。重以酒盞盤餐。頻煩厭飫。辱在臭味。未敢以口腹鳴謝也。銘戢銘戢。別來

惘惘如失。惟犀梁顏色。時見夢中。生平不耐俗累。入門便病。老態具見。不知後會尙有期否。忠襄公全集未蒙見賜。欲僭爲一序。於拙集中。不可少此一題也。見付爲荷。

與汪異三

花溪校書。將及兩載。賴年世兄與奉世。晨夕周旋。忘羈旅之苦。獲朋友之樂。欣慰如何。道義之重。等諸骨肉。古人所稱。在今亦罕見其儔也。西山之游。與光福寺看花。有詩合集。以紀勝事。爾時人事叢脞。到家苦趣種種。未能屬筆。病中時展佳篇於案上。冀一效顰。得句當續寄也。久不作詩。小兒臨行。忽出紙索書奉贈。及奉世兄。就案上雜稿。錄呈兩首。皆與東海昆仲作。未免雷同。且書法不佳。秘之勿以示人爲妙。近況詳奉世札中不贅。去秋因刷印無資。携歸拙刻甚少。此書頗爲江上盛傳。求者無以應之。不知別後。坊人有問津者否。小兒有事玉峰。亦便謀此事。惟世兄與酌之。照例隨宜。不圖獲利。且多分書以應所知之乞。如何如何。錯字尙多。已一一改正。召梓人修補印行。爲囑。小兒來。一切指示之。夏秋間。賤體稍健。尙能東來握手。亦可知窮鄉不毛。莫將一念。惡甚惡甚。鑒念不一。

與姜奉世

久客吳門。承世兄朝夕過從。忘其羈旅。通家古道。近代所無。世兄出自至性。直令疏野之人。形迹俱妄耳。惟是以口腹見累。頗損清囊。貧家留客。豐儉隨時。若過費盤餐。恐所入不敷所出。其何以爲繼乎。竊爲執事慮之。歲杪勞在茲。兄回吳一行。奉寄。併寄道積。想俱到。略悉客途情事矣。僕到家便病。有田數畝。早早晚晚。連歲顆粒不收。待哺四十餘口。升合零羅。舊冬竟無以度歲。舍姪孫菽鬲。亦同此苦也。又負人之物。半以田抵。田既不收。又須買稻賠租。歸贖寧有期乎。以此追呼交謫之聲。耳根如沸。祇日增其病。今老態亦具見矣。聞徐立老恙未愈。中心懸挂。衰病不能遠涉。特遣小兒代候。倘五月江平。賤體稍健。尙須一親來也。比公於我。情有獨至。義不容已耳。道積命卒藏山閣之刻。今已始事矣。相見時爲致謝萬一時事。如此交游。當慎比語。尤爲東海一門。微有言未敢盡也。徐侯齋近狀如何。鄒孫知覺益進。欣望欣望。藏山閣乞序。能爲拈筆否。但得數百字。略述本末。以介於端足矣。書固未能行世也。唐鐫老已得幕席否。非此席何以爲生。念之念之。練勤能者。勇於有事。到敝鄉一無所事。未

免皇皇。頃隨小兒來。亦卽令交還故主。想亦需左右使令也。馬先生在館。致意致意。勉仲尊恙。當已大愈。學在遠游之興。近狀如何。均爲致拳拳。併謝旅中疊擾也。燕初學當日進。莫將一念奈何。

田間尺牘卷一終

田間尺牘卷二

桐城錢秉鐙飲光著

龍溪居士校刊

與王安節

雨中分袂。孤篷獨往。過蕪湖。以舟中有酒六瓶。爲關吏所稽。留滯五日。困苦可知。獻歲新禧。惟發筆大利市。是望如何。子介數過語否。拙刻付坊間。何法得推行。昔聞董言。宰賣畫自用。重價購之。未審同人有行此法者否。一笑一笑。千金方望以見寄。已乞諸勞仲許我矣。又及。

與潘括蒼

留滯花溪。將及兩載。賴世兄晨夕周旋。天涯骨肉。頓忘羈旅之苦。但屢以口腹累昔。藉盤未免不安耳。到家卽病。苦趣種種。又彬來當悉之。又彬行時。僕適過白鹿山莊。相距僅二十里。不遣一字相聞。僕到家之刻。卽其發棹之刻。忽忽若此。深可怪也。數接尊公手訊。意興頗佳。僕老病相尋。咫尺山城。未能覓一晤語爲恨。頃小兒來。無一定廬所。令往來於奉世異之及世兄齋頭。想不厭耶。一切期指示商酌之。爲妙。

與查夏重

秋風不競。同人大半落落。未免惆悵。然僕所望於世兄。與世兄所以自命者。正不在此耳。德尹應已南還。共聚東山也。念之念之。承致書敝邑。令君小兒面呈。略叙神交數語。僕既未往謁。彼亦竟相忘也。令君長者。但恐渾厚特甚。爲胥吏所用。洎任以來。屢經上官切責。豈幕中未得其人耶。世外野老。理亂久付不聞。念係世兄至戚。輒用關切。家報中須屬其認真。敝邑固未易治也。士紳之間。交接當愼。禮法宜微。有分別。毋爲不肖者所狎。而爲賢者所疏也。如何如何。小兒到山。候東海先生起居。幸念通家。勿惜教誨。亦欲來効抄寫之勞。此時尙未暇也。便候不多叙。

與徐方虎

去秋敦老入都。便致一臧。知先生垂念故人。所有鄙私。應不漠然置之也。茲以舍姪光慶廷對之便。輒附數行。舍姪可有過人之資。於敝邑薄有聲稱。門祚式微。不獲一第。今始循資入貢。且將肄業成均。以竣鄉試。才華譽望。不敢上比先生。至於擅長藝苑。魚園場屋。亦畧髣髴先生未遇時也。今幸在弟子之列。足慰其仰止依歸之素。倘

蒙推分通家。細加指教。時雨之化。自當蒸變日新。不負提命耳。大司成當代人師。亦知田間有遺老否。併藉鼎力。轉致微忱。舍姪帖括之外。頗多雜著。文筆之敏速。腹笥之該博。先生試自知之。固不敢以所私先容也。但苦一貧徹骨。旅食維艱。知交中乞廣爲掄揚。西席幕賓。足以給其朝夕。長得奉教左右。造育之德。合門以之。懇切懇切。弟子去冬窮愁之中。又了得莊屈合詁一書。此書屬稿數年。今始卒業。自謂無復疑義。詩文未刻稿。刪定之餘。卷帙尙逾尺許。合之詩文易學。生平心血盡在此矣。向蒙司農許爲流布。至今未見施行。然豈司農一人責耶。先生宜與諸知己爲分任之。南來當事。各任一種。似亦非難。弟今年七十五矣。將更何俟耶。惟留意萬萬。嚴方貽房。與公併以此意致之。方老曾致一函。未達耶。與老未及作字。有白松歌付李杞瞻。乞郵寄。併爲道及王忍亭相晤。言及去秋有書。目下欲往京口。專候先生及忍亭書至。再貴池趙父母。向蒙枉顧。未獲親炙。所治僅隔一水。乞數行介之。

與程非二

昔憶握手論心。有如夢寐。二十年來。再接手教。良誨殷殷。知故人甚不忘我也。屢有

報書道阻莫致。每遇貴鄉同人。輒託爲轉達鄙悃。吾輩俱老矣。不知此生尙能促坐剪燈。述天寶間遺事否。曾荷扇頭佳句。知老夫游興未倦。勉以數影江邨。知已愛我之深。感激無已。弟之游。其始非以謀食。實以遠害。故自署爲客隱集。此中苦心。其去市隱無幾。不意垂老乃復爲謀食之計。有五孫五曾孫。長者皆已婚嫁。幼者就塾讀書。衣食膏火。皆須此白頭一翁。而弟復半生汗漫。不諳生產。游裝既返。有洗有漬。牛馬力盡。枯井難填。既無管幼。安之堅忍。又無陶元亮之曠懷。每一出門。自念平生。輒爲汗下。因憶故人。曾以道義相規。不自覺其言之縷縷也。今年七十六矣。黃山之興。老去未衰。然亦託之夢想矣。因汪扶辰兄之便。輒附數行。扶兄詩篇諸體畢妙。近代作家。不得不以相推也。又復。

寄龔千谷

弟以衰殘遺老。不合時宜。而簪履之情殷。有逾常格。固知先生之不忘舊好。實不忘先端毅也。此豈時輩所知。亦豈足與時輩道哉。惟吾兩人默契而已。別後數日抵關。於便郵中附致數行。六月盡。舍姪有金斗之行。又作數行。託叔損兄附入家報。以期。

必達。比云六郎帶回。頃在白門晤展冲。言付屬會使者。此恐未必達矣。歸舟載米。幸不虧本。就中情弊。已悉前札。此行可稱壯游。而耗星坐財帛宮。舊債未償。新負百出。牛馬力竭。枯井難填。真可歎也。兒輩場事已畢。即買棹江陰。謁謝李醒齋。將便過玉峰。一晤果亭。因健老春間有約入都。弟老矣。不勝鞍馬之勞。故往商之。頃因新安方望子之便。輒附起居。望子與弟交甚久。篤行君子而好學者。昔年在燕時。過齋兄省。與先生識面屢矣。足跡半天下。今復爲漢上之游。漢上賈人多其宗戚。思得望兄顏色。故敢爲之介紹。但得推分加之禮貌。使賈人子刮目相待足矣。絕無干請也。惟留意萬萬。近狀可略悉之。望子束裝。忽忽倚席。草率希鑒。

與張壽民

世外陳人。萍蹤汗漫。荷世翁故舊情殷。周旋逾格。館餐服御。殷勤無已。小兒旣微惠。得以早還。老夫臨行。復蒙解贈。種種高誼。具悉之。樂令以致感激之私。憶使者至敝廬。正值舟子告增關稅莫償。俗緒交逼。未暇報章。老人褊躁。不耐世事。過此登舟後。回首雲天。感故人之大德。念會合之難期。爲沾洒久之。以五月初旬抵家。米價頓減。

幸不虧本足矣。令岳從都門遠頒清俸。銜戢如何。頃于白下晤師魯道積。知合門安吉。爲慰。今因新安方望子漢上之便。輒附起居。不多及。

與陶誕仙

弟與先生聞聲想思。一見投分。盛暑之月。猥承開樽快論。爽氣襲人。如坐謏謏松風下。肺腑俱沁也。別後卽送兒輩觀場到白下。便過江上。又承文衡後命。扁舟再往。凡留滯月餘。竟以衰病蹢躅。未上君山爲恨。晤貴邑同人。殷勤問訊。高風俠氣。異口合詞。趙翔九弟舊交也。質而好客。頻以口腹相累。莫効寸忱。奈何奈何。小兒先面託寄一函。應達掌記。更有一函。併劉令親家報。總付舍姪孫轉寄。此子尙滯貴池。旦暮返里。卽面奉上。弟春間未回時。崑山致書有都門之約。今更承文衡德恩。代爲束裝。且因舍姪孫公車之便。擬與同載北去。衰年遠道。歲晚天寒。行裝蕭索。資斧缺如。敝邑諸友相邀結伴。業已戒期。告急無門。徒有仰屋。先生其何以策我。昨暮入市。知文衡駕在此。因胃寒小恙。艱於步履。特命小兒叩謁。幸進而教之。少健卽圖造席也。

與查某

客都門八閱月。荷諸君子不棄老耄。往還唱和。欣慰如何。如文采氣誼。極一時之盛。而真情爽致。古道照人。不得不推世兄領袖也。尋在通家。尤深依戀。陸冰老知己到家無恙。夏重魯兄再入都否。朱晦人臨別。約到皖查事。聞撫軍訊其游踪。頗深相念。正不知何時到皖也。京華春集。一時盛舉。竟中廢耶。當時分題而詩不齊。齊而不付梓。未免可惜。舍姪歐舫來。合志重興。無令異已者爲齒冷也。如何如何。佳稿屬題數語。貞一令詒。皆以見委。此萬不容已之文字。稿藏腹中久矣。俟到吳門撰上。卽欲入集也。竹垞日下舊聞。其書略未寓目。何以屬筆。便以數卷寄玉峰。覽其大概。方可作序。拙集中亦不可少此一篇序也。致之致之。荆山聲山。近況當益佳勝。同集諸子在都下者幾人。凡夫已陞遷耶。統爲致念。臥疾月餘。今始握管。手戰不多及。

與張敦復

三春間。因敝宗禹銘入都之便。附候一函。以拙刻詩學呈教。併真定公所賜二函。託爲璧還。知俱達左右。七月間。始聞公膺宗伯之命。旦暮揆席。爲鄉國光。可勝慶快。但賜金園新陰相待。又遲數年矣。聞仍兼掌院。勤勞未減。如何如何。念之弟爲刻書事。

久滯吳門。今始告竣。月內已理歸棹。明年八十矣。從此戢影江邨。絕迹遠去城市。不知先生聚首尙有期否。弟寓花溪久。值東海昆季相繼返里。在弟甚愜所懷。而在世局甚可怪也。兩公於先生。可稱莫逆。頃者風波。殊出意外。海內有心者。莫不憂虞憤怒。所關於世道。恐不小也。健老屏迹包山。畢志纂修。寢食俱忘。固已絕口世事矣。立老到家。蕭然資用。窘絕過關時。爲關吏發篋。搜檢囊底。一無所有。此從來大臣未有之陋。然亦可藉以發明其素履矣。與弟樂數晨夕。每言及先生。古道照人。人品心術。學問文章。皆爲當今第一。且於彼昆仲。事事關切。感不可言。先生實心爲人。不令人知。弟所深悉也。彼亦深悉之。每言及。至於歎歎流涕。由至誠足以感人也。弟與東海游處。向猶未深知底蘊。今久在吳中。益悉其居家孝友嫻睦。可爲家法。至其子弟之賢。循謹守禮。謙虛下士。近世罕見。而反遭奇譏。是非倒置。匪夷所思。今事已往。不必抱悶已。惟是東海之居心行事。一切從厚。不媿古人。弟窺其於國家之間。君父之事。無不實實盡心。使此人歸田。先生諸賢在朝。毋乃自覺少孤乎。知爲世道人心計者。自當力持正論。挽回時局也。先生在帝左右。凡百斡旋。自非外人所聞。草野衰老。無

關時事。杞憂瘵恤。不覺饒舌及之。

與韓慕廬

比在花溪。樂數晨夕。不覺一載有半。每聚首忘形。語從肺腑。禮無世法。朋友之樂。於斯極矣。忽焉別去。何以爲懷。雪後奇寒。門人輩擁爐談易。忽有瑤函。從天而降。知故人相念。屬有同心。驚喜無似。前惠佳篇。沈鬱頓挫。韓柳遺音。什襲藏之。珍爲世寶。乃猶未嫌於意。更加改潤。不憚數千里。冰江雪浪中。遣使相易。可謂一痴。要亦是佳話也。捧讀新篇。益臻純粹。知先生精研此道。不肯一字苟就如此。然弟既獲奇珍。復據原璧。兩不忍捨。因來諭切切。割愛奉還。徒有惋惜而已。聞新令給假者。盡促還朝。恐東山之臥。亦未能堅。不知弟與先生。此生尙有握手之期否。言之惘惘。健翁進呈山左志。曾奉優旨。念之念之。弟到家即病。至今未愈。敝里連歲荒歉。弟家則粒米不收。合門四十餘口。嗷嗷待哺。梨棗之役。豈有餘資。入門卽糴。何以救赤春耶。犬馬之辰。當從一二老比丘。謝客窮山。弟意卽欲從此長往。以謝子孫。不能八十尙役。役爲其牛馬也。且將何所之乎。東海公云。爾時遣使見存。敝居荒陋。使者所見。此萬不敢當。

且已早出矣。先生晤時。爲我確辭之。燈節後。遣小兒來候起居。併面謝也。包山之約。亦在夢寐。我輩行止。未能自定。一聽機緣耳。劉兄所乞尊先公傳。春煖卽屬草。弟近日精力已衰。文思大減。但如此紀行。不敢不力疾爲之。決不負也。丹霞近狀如何。亦念老人耶。過燕關有酒六誦。關吏羈留納稅。口號五首。其一云。舟過燕關不放行。爲貪餘瀝阻歸程。多情轉怪韓元少。此是承君送酒情。因贈酒在數書之以供一笑。東海先生昆仲喬梓處。欲呵凍作書。因使者促回。挑燈作答。不能及矣。希致意焉。使者苦寒遠涉。貧家多慢。愧甚愧甚。方靈皋承獎許。感激感激。爲轉致盛心。

與林廣文

春間率爾造席。一見傾倒。半日坐春風中。不知其心醉也。嗣小兒趨付函丈。附拙刻請正。小兒深荷提命。誼均骨肉。感激無已。頃小孫復辱在門牆之末。兩世師承。自慚桃李。惟以得霑化雨爲慶耳。弟因都下諸公。爲梓拙稿。午後卽發吳門之棹。擬以小孫相從。司校訂之事。恐送學大典在卽。未敢自外。特留侯送學畢。卽乞先生予假東來。且旅次衰老。似不可無人在側。秋末冬初。便令返棹。趨候門下也。先生篤念氣誼。

應不悛破格見允。倚舷草率。惟鑒不一。

與某

鄂渚邂逅。僅得促膝一談。而風裁碩論。頓爲心折。固知爲當代偉人。非徒以聲名震世已也。丁卯歲盡。爲友人招入都門。老年翁政聲冰操。洋溢燕臺。弟得之當事之口。不勝欣慰。節鉞之推。應在旦晚。輿情共屬。不啻同人期望也。比知文房奉候。欲附數行起居。併寄拙集。以踐昔言。而文房行時。未及相聞。鄙私未達。鬱鬱至今。去年秋九月。始遂伴南還。又未能單車迂道。奉叩鈴閣。弟老矣。何時再得一握手耶。頃因都下諸公。爲刻拙稿於吳門。親自校讐。恐非旦夕可畢。年近八旬。役役無已。良可浩歎。家表姪董穉公之便。輒託省候。亦未知老年翁尙記有田間老翁否耶。穉公爲觀察公故人。古君子也。亦欲藉便請見。以慰宿懷。惟老年翁稍加意焉。足令游子生色。感哉何如。拙刻附覽草草。

與查某

昨早趁韓慕廬回舟遽去。不及晤別。僕老矣。不知後會尙有期否。言之惘然。倘精力

未衰。明年夏秋間。或能鼓西山之興。亦未可知。拙詩一本補上。扇頭詩句甚工。末有馳書棕陽令語。能便附本人帶去否。孫曾考事。能得前列。爲院試地。便是大惠。孫曾輩皆能捉筆聽考。于數甫臨十齡。文有奇思。當事能物色之。不負所拔也。

與袁士旦

弟以昨暮抵關。擬過關後奉晤。乃有酒數罈。一路飲剩者。爲關役稽留上稅。計所費不過數分。淹阻歸舟。未知何日始去。八十老翁。一生湖海。不意今日爲斗酒累。可發一笑。兄能過舟一談否。倘未能卽行。當携手過雲亭也。

與余怪廬

不奉台顏。於今三載。依戀之私。何時能釋。都門別時。承台命諄切。未敢追送河干。陳仲夔自舟次還。悉知公懷甚曠。爲慰。嗣附一函。託仲夔郵致左右。應已達覽。是年秋盡返里。謁敝鄉撫軍楊公祖。一見。卽道我公臨別相託之語。世外老狂。承公達人推獎。何以克堪。知已誼深。惟有感泣。比擬急趨白門。中疇昔卜鄰秦淮之約。緣皖池兩守。面承撫軍之命。小措刻資。坐此稽遲。謬思有濟。乃使節甫移。吏情已變。涓滴莫邀。

空擲時日。至次年五月。始能拮据東下。思一晤我公。面請教言。卽載書入吳。從事剗
劖也。舟泊南關。卽日造門。便期促膝。不料閣者堅拒不傳。屢造屢阻。隨泐數行置懷
袖中。遇一年少操吳語者。因付此書。不知曾入掌記否。徬徨數日。舟小暑酷。遂乘風
東去。此後有聞。惟咄咄書空作怪事而已。夏秋之間。正謀買舟省候。忽聞駕已旋楚。
悵然中止。已知秋後始發。爲此一阻。聚首無期。相去益遠。何處得鱗羽之便。覓寄一
行。鄙意亦欲速了刻事。脫身西上。晨夕晤言。區區之懷。固非筆墨可罄也。乃都門諸
老所致諸當事書。應者漠然。以致梨棗久羈。拙集六種。僅刻其五。費且不給。更加刪
削。延至去冬。將草草以告成事。冬半言旋。值里中兩歲奇歉。合室嗷嗷入門出門。固
難率爾。纔覓小艇。於季冬將溯流西上。度歲寒溪。知公賓閣中。亦樂得白頭老友。圍
爐共話也。何意奇寒積冷。累旬不開。至新春又復雪深數尺。衰年遠道。未免意沮。本
志莫遂。留俟春杪。遙憶我公目中久無故人。訊字必訝其何以久疏。至僕亦久不悉
公起居。情無能已。特遣小仆冒雪前來問訊。並賫刻過五種奉教。此皆台意。素所欲
成就者。卽令授梓。猶是齒牙之餘惠也。僕今年八十矣。衰憊已甚。歲月無幾。此生寧

遂不一握手耶。春夏間。倘賤體猶健。布帆安穩。少酬此志。否則亦令小兒叩床下。代申鄙懷也。呵凍挑燈。情長楮短。鑒之。

與黃岡縣正堂

比在花溪。時接笑語。乃聞鷓首西上。未獲趨送。晤宮聲。知在官舍。起居調適。爲慰。愚以去秋八月。刻事始竣。因梓費不給。所有六種。僅成其五。冬初返里。風雪擁戶。遙睇黃州景物。無由溯流一聽大令琴聲。枕被連宵。共作西堂之夢也。頃因小介有事於楚。便道附候。拙刻未及呈教。春夏之交。小兒或有江漢之行。當遣拜床下。奉教長公。併以諸刻呈正。率爾數行。唯鑒萬一。

與潘木厓

春雪連旬。終日擁爐不出。甫出而手教適至。過歸與趙生有言。則已早發矣。吳下諸故人。未附一字。可怪也。拙集本不宜刪。刪者可存。存者正多可刪。以此自悔。蒙獎許。媿甚。媿甚。周大生約以二十三日到。到時恐刻資已盡。惟望東來兄設法濟我。勿悞乞轉致之。

與石漢昭

春雪淹旬。終日擁衾堅臥。甚矣吾衰也。遙念龍眠。山色水聲。惟有夢游耳。往來傳君家孝友足法。且知令弟敏辨老成。兼精舉子業。甚可喜也。

與扶升姪

積雪凝凍。十數年未有之奇寒。老人絮帽蒙頭。不窺門外一步。衰態可知。吾姪近況如何。新年佳句幾篇。僕於此事。行將廢矣。抑之兄老健如故否。併問。便候不多及。

與某

拙稿草率付梓。專欲就正。有以教我。乃不蒙箴錘。而過加獎譽。非所望於老友也。佳句錘鍊之工。增我形穢。古詩漢魏近體。純乎三唐。皆在氣韻間也。敬服敬服。即日返棹。未及詣別。倘神力未衰。後會或尚有期也。另一函併拙刻寄家湘靈。惟便致之。

與錢即九

旅食吳門。將及兩載。猥蒙同氣之誼。多所關切。又數以口腹相累。盤餐過侈。未免重損清癯。以是跼蹐不安耳。敝里頻歲奇荒。顆粒不收。合室嗷嗷。待哺一老。僕入門便

病衰颯不堪。呼負交謫之聲。耳根如沸也。奈何奈何。禹銘已南還耶。昨又附舍親姚綏仲一函。託其多方照拂。既爲汪司成所留。文衡幕不難入也。不還當有家訊。念之念之。拙集頗盛。江上舊秋。因無刷資。携回甚少。無以給求者。老弟向欲令坊間刷印分書。小兒來亦謀此事。幸指示之。有以復我。爲荷。窮鄉莫將一念。慙甚。惟諒不一。

與宋實穎

江城聚首。慰我數十年風雨之思。忽焉萍散。老年惜別。尤難爲情也。是冬卽有都門之役。至夏五月。李醒齋開學還朝。每退食相招。把杯談讌。未嘗不企想風流也。弟以宛平東海諸公高誼。爲梓拙集。於去夏始事。今秋告成。羈滯吳門。兩易寒暑。有集六種。已刻其五。禍棗災梨。抑已甚矣。春初從家訊中。得先生去年寄書。過蒙獎譽。殊不敢當。然出自知己中心之好。非時俗虛諛者可比。慙慙之餘。益以自信。感哉如何。大集久播國門。獨弟未獲展讀。能惠致老耄。令聞所未聞乎。弟所刻經解。有田間詩學易學二種。又莊屈合話一稿。詩集二十八卷。文集三十卷。承問及敢如數以對。諸君子。念其已老。留此一點心血。其書不足存也。擬付一二種請教。特詣尊居。冀晤令郎。

面致。乃誤造貴同姓宅。相顧茫然。問知合門。皆侍養昭陽室。虛無人。悵惘而返。此亦老人昏瞶可笑一事矣。弟頃已買棹返里。刻板仍留吳中。弟明歲八十矣。倘精力未憊。尙可東來。奉書請教也。臨行託洪丹霞兄致此數字。不盡欲言。

與席元公

癸甲之際。於都門邸舍。獲奉顏色。未傾鄙懷。業已心醉醺醺矣。別來淹忽。將及念載。每晤元郎。問訊起居佳勝爲慰。比來三過洞庭。準擬暢叙闊私。皆不相值。可勝悵惘。拙集託元郎轉呈記室。乃蒙憐從遠存。兼荷腆貺。益深慚悚。卽日返棹。未及訪戴虞山。殊乖夢寐。健老尙訂明春之約。倘精力未衰。扁舟乘興。與老翁圖晤。尙有期也。暫此鳴謝不一。

與葉見初

寅冬鄂渚。與尊公及世兄周旋月餘。得慰數年闊私。次年初夏返里。爲都門友人相邀北上。於同人座中。得尊公凶聞。驚悼欲絕。憶僕初訂交延津。一見莫逆。意氣文章。具有水乳之合。平生知己。實無幾人。十年後再見於大梁。以至丙寅鄂邸。重得聚首。

蓋二十年來談鋒三接彼此交箴古道交情於今僅見何意遂長別耶後世誰復相知定吾文者言之涕泗僕今年八十矣衰憊已甚未能遠涉寒江捐棺一哭知墓有宿草矣偶有小价道經貫里特命叩廬候問便申鄙情倘春風帆利衰疾堪扶尙得重尋三徑與世兄握手言悲也遺稿甚多曾付梓否見示爲慰

與家枚一

春間遣小价有楚江之役便附一函伏承手答略悉起居爲慰秋來再過吳門擬竣拙刻未竟之工不意時局大變亦竟不能竣也東海近事想所悉知尙未知作何究竟耳在吳與庸亭弟數相往還見其身體大健面色敷腴較去年佳勝數倍甚可喜也種菊盈庭時招故人觴詠其下興會可知想聞之爲神往也長公政事日新皖黃接壤誦聲載道屬在宗好能無眉舞素未接見不便造次通問幸爲老人道關切之誼屬望之深也小兒偶過武昌花封對岸命其攜謁琴堂一拜長者於床下非有希望於安邑也惟進而教之拙刻詩文二種分贈番梓因艱於刷印不獲以全本各種請教爲歉老人今年八十矣心血日枯筋力益憊西堂風雨時在夢中不知聚首尙

有期否。念之惘然。挑燈率筆。不知所云。并長公希鑒一切不宣。

田間尺牘卷二終

田間尺牘卷三

桐城錢秉鐙飲光著

龍溪樓室主校刊

與葉見初

春間小价回。接三世兄裁答。知大世兄已捷楚關。不勝慶快。擬卽乘風舂蠶。以竟先公未竟之緒。以慰老夫通家之望。何又暫息天池。乃竣搏扶搖而上耶。故人年已八十。青眼高歌。所望者尙有幾人。勉旃勉旃。拙集詩文二種。分之兩世兄。存之箚中。以識嚆昔唱和之雅誼。一展閱各省往事也。小兒與兩世兄曾相識。頃到貴縣。當有數日留。幸一切教誨之。客途照拂。知親同骨肉。不煩申囑耳。

與文行遠

辛酉八月。章門僧舍。茗飲話別。至今已踰十載。江舍親輟翔仕途。去官亦未返里。過里亦未接面。以此世兄近况。音問杳然。三百里內故人。如在海外。甚可怪也。小兒偶有楚江之遊。道經潯陽。命其尋識舊居。恐仍在柴桑。留此數行附寄。知老人年已八十。尙不忘同志也。

與姚綏仲

舊夏獲奉手教。甚感。秋間復往吳門。有慰弔之事。亦情不容已者。每遇北去人。輒欲寄訊。知已請假寧親。行且出都矣。大綱節目所在。聞者莫不以爲允當也。欣慰欣慰。世兄孝思天性。固故人所習知耳。冬底入城。專省尊公。氣貌如舊。但神智罔罔。不能識人。脾胃兩家甚旺。病在心病。是思慮憂恐所致。似非參附劑可愈。世兄到家。自當勿藥有喜也。近狀如何。便示慰我。亟欲握手一叙。惟一二年來。衰相具見。相去百里。輿馬之勞。絕不能勝。俟水漲舟至孔城。力疾入城。當在四五月間。倘有事。黃華去敵里甚近。能就便枉過田間。種種欲得面悉也。窮村閉戶。耳目都廢。東海消息。至今杳然。何信周時相聚首否。甚念之。徐方虎尙在京耶。吳元朗。陶紫司。王令詒。諸同年。當已謁還。幸一一示我。

與潘木厓

今年奇熱。入秋尤甚。四威儀中。惟有坐臥。坐少臥多。自是老人常態。然惜無北牕。可作羲皇夢也。苦趣苦趣。目下卽欲遣价往吳門。有家訊幸付之。未知文宗校士何郡。

八月間。想轉科考牌矣。陳滌岑奄逝。老友益稀。可勝淒感。大匡或猶未至。特遣刺專唁。爲致鄙私。村中久不見縉紳錄。聞徐方虎已爲大司農。王鶴汀有會推皖撫之信。然否。乞示之。

與石漢昭

秋暑不解。坐臥無地。筆墨久廢。欲遣使吳門。亦不能作書也。苦趣苦趣。陳滌岑長逝。故人凋喪。可勝淒然。小价往唁。作一名刺與之。因笥無素柬。未便手書慰綏士也。乞致意。口中枯淡。城中有餅糕酥果之佳者。以一二味寄我何如。

與扶升侄

酷暑無地可逃避。惟有南牕高臥。臥多坐少。當是老態也。二刻集樣。且寄一覽。目下即遣价往吳門。元少序。當爲轉乞。滌岑奄逝。可勝淒感。城中老友無幾人矣。一刺遣唁。希致之。

與潘木崖

作字甫竟。陳官儀郵致手劄。爲小孫寸進助喜。知老友之關情也。此事殊出望外。蒙

日 月 記 卷之二
當事教舊留心。不能不感知已之深耳。陳姚二老。相繼長逝。人過七十。朝夕不可知。正不論老健與衰頹也。可爲浩歎。小兒爲查重夏荐入九江幕中課蒙。考後即去矣。市屋無人。令孫每至。不得晤。一茶未獻。念之慚恨。奈可。

與陳官儀

有詩寄遠人。置郵筒中去。欲得佳紙。高五寸。作烏絲格欄。須兩幅。一闊一狹。闊者可寫二首七律。狹者只一首耳。惟兄與大文爲我謀之。大文固善此事也。否則名箋足用者亦可。至囑。

與姚綏仲

突聞尊公之變。痛不可言。病勢知久不起。雖伏枕良苦。乃溘然長逝。終古不復相見。痛可言耶。僕於其髮燥時。即以國士相許。而尊公於詞壇競起。獨於僕有私好焉。吾鄉不足論。即四海相知。屈指豈有多人哉。暮年居里。正可聚首。一病一衰。咫尺隔絕。今已矣。誠諸指顧。宛其猶在竹葉間也。痛痛。僕筋力益衰。多臥少坐。籬壁以外。跬步維艱。鞍馬之勞。久不能勝。用是不堪匍匐。惟有西望龍眠。長懸淚眼耳。世兄得假早

歸親湯藥。啓手足。不致終天遺恨。此人子不幸中之大幸事也。漳州訊去。往還恐須數月。成服之期。當在秋杪。爾時江潮未落。孔城可到。尙想扶衰以前。終不能已此拊棺一哭也。兩弱弟呱呱可念。極知世兄友愛。併其母加意照護。此亦慰九原之一端也。因舍姪入城。率佈哀私。天暑。孝思節慎。勿過毀。爲禱。

與方受斯

汗漫之迹。少至里門。與世兄分袂。不記是何年也。自司錄以來。譽聞日至。每遇新安人士。極口誦揚。輒爲通家生色。午秋何屹瞻兄便。作一函奉寄。此兄後亦未來。鱗羽參差。無由致相思也。滯吳下兩載。刻成拙集六種。所費不資。皆出故人攸助。紙價湧貴。刷印甚艱。僅以易學一種奉寄。聊識先世傳經之意云爾。往來傳廖父母吏治清操。當世無兩。不勝欽遲。聞係將樂籍。僕向年理延平時。迄今四十七年矣。計此公尙未生。一時交好。零落已盡。今獨有余不遠耳。不遠去年來遊。曾晤否。郡司馬屢致殷勤。僕今年八十一矣。豈能復作黃山之夢。敬以拙集詩稿一本。託爲轉呈廖公。致老人仰止之私。亦并州故鄉之誼七。倪叔昭今年失館。遠求糊口於大阮。恐未必遂。望

世兄多方周旋之。或介紹於廖公。云係僕肄業門人。借此與合邑士大夫往還。或有機緣。留意留意。拙稿須面呈。道僕近狀。倘意中有我。當更致書以世兄奉託也。便寄一言。冗次不文希鑒。

與魏州來

午秋別時。相期中秋後必過吳門。而令弟復委序令叔遺稿。此僕意中一事。令叔稿不可無我序。拙集中亦不可少此一篇序文也。相候久之。訊字杳然。令弟或不汲汲於此。固知世兄不能扁舟獨過也。東海書來。言流寓武塘。甚得同志諸子。樂數晨夕。承遠念老夫。感戢感戢。弟老病侵尋。古人所云年高衆病歸。不足爲怪。大抵中氣衰弱。心血枯耗。醫家謂須大補。非參不可。此物豈貧人所能辦乎。近來苦趣。與老俱增。不足爲故人道也。別時交讓衰甚。今且如何。念之。諸令姪及禹平皆在家園否。吾家孝起閨瀛。當時時聚首。同宗關切。自是一本。二子尤覺依依。閨瀛午秋入省。竟未一晤。吾老矣。不知尙有晤期否。方虞律係直之孫。密之姪孫也。肝胆意氣。酷似其祖。倘過武塘。謁東海君。世兄及諸子世交。乞多方周旋之。爲屬。

復倪叔昭

枕上得手札。知有新安之游。披衣起作一函寄方世兄。託彼介紹。以見當事。僕未能遽致書也。但令叔頗與格格。須開誠化解爲妙。令叔處亦不及附候。貴人善忘。胸中亦未必記得此老矣。一笑爲致意。

復方受斯

倪叔昭回得手訊。彙悉近況。爲慰。大馬之齒。倏逾八十。念在昔游處。如同隔世。童丱之交。零落殆盡。如足下以孤穉相見。今且踰強仕。倏忽又四十餘年矣。令伯亦不相聞問。但在湖南得其游況耳。回思往事。可勝淒感。世外陳人。尙蒙記憶。遠頒厚貺。古誼殷然。銘謝銘謝。前寄廖公一集。未達。頃更如台諭。以全集五種寄呈。更煩執事裝訂。共作兩套。邊欄空紙。屬善書人楷書某集。大約文集作六本。詩集四本。詩學六本。易學四本。莊屈二本。近尙厚本。若吳門共作十六本尤妙。但須分定。付裝書人。否則任意加減。以致錯誤。此大費世兄一片心血。亦不無小損首藉資耳。廖書閱畢。封去爲荷。靳公久知有筆墨之好。去歲在吳門。有致書爲僕地者。僕以衰憊不任遠涉。力

辭之。今乃遠還耶。聞其嗜痴。以不獲一晤爲恨。見時乞致此意。余不遠自海陽重至。湖州買筆。行李蕭然。不能歸閩。可謂孟浪。僕來時。爲託太倉諸友。資其扉履。恐不能如前番矣。木門好友。一生官迹。皆天下絕險惡處。念之浩歎。叔昭貧乏如此。不能朝夕自給。走投乃叔。來往千里。未知館穀之外。尙少有潤色否。此人近體詩頗堪應酬。諸當事或有所需。惟不惜齒牙借之。即海陽門人。及諸相知。皆可推分也。留意留意。外詩一本補上。近日紙價既高。刷印甚難。板在吳門。不能多致。諒之。

與倪越公

猶憶三十年前。秦淮夜雨。挑燈水閣。聽孫雨田倚檻吹簫。宛如昔夢。嗣於吳門張如三學舍。文旆至止。值弟且返廬。但見僮從先來。屬爲寄聲圖一晤言。似未果也。今計亦已十餘年矣。師道日尊。譽聞益勝。拭目陞遷。區區百里花封。恐非意中事也。兼聞長公文聲大噪。副車鄉試。騰驤在旦暮間。木天一席。是君家舊物。固不難接武耳。欣羨欣羨。弟於廖父母。微有并州之誼。然未敢未同而言。接台論。知其意中尙有陳人趣通一函。併寄拙集數種。託方受斯爲定裝呈去。不敢以勞先生也。余不遠於去秋。

九月又晤於吳門。游囊已盡。歸計茫然。弟來時。託太倉諸友爲之設法。濟其扉腹。不知此時已抵鑄城否。令姪孤生自奮。世族中之傑出者。一貧至此。其能始終成就之。則在先生耳。覽其近體詩篇。不遜時輩。諸當事及相知中。倘有應酬。以之應命。或亦可稍爲潤色乎。弟年逼桑榆。游事已廢。生計蕭然。不能稍有攸助。每念艱苦。徒爲拊心耳。奈何奈何。拙稿板留吳下。兼以紙貴。不能多印。更以詩集一本奉教。早晚亦欲遣小价入吳刷印也。承遠頒徽墨青鎮。皆所急需。銘謝銘謝。叔昭行遠。勿勿裁復不一。

與休寧令寥明府

伏承老父母蒞治以來。冰霽仁聲。騰播江表。不獨黃海輿誦。謂爲百年來未有之慈父也。海陽人士。足迹徧天下。口碑布道。窮海內外。莫不歸依。所謂鶴鳴鼓鐘。誠有其實。不能辭其名耳。欣羨欣羨。弟四十年前。曾遊貴鄉。嗣是凡三入閩關。羈棲既久。遂有室家。迄今內外數十口。半屬閩人。視閩爲并州。視老父母猶鄉親也。欣慕之餘。竊欲附候。一致鄙忱。深愧無因。乃舍親方廣文。每有家訊。輒贊揚仁風。託其以拙刻奉

教頃舍親倪生叔昭回。言所寄未達。兼述老父母習知遺民。時爲齒及。方廣文亦以爲言。輒敢以拙刻全部呈覽。尙有一集。亦已授梓。皆在貴鄉與嶺南所作。未免略涉避諱。不便印行。俟更續寄。去秋九月。又晤余。不遠於崑山。云自新安來。竊怪其不即返里。更事東游。詢知制筆湖州。約需筆價三十金。不知此老此生。何以尙思用三十金筆也。可謂曠士。然亦未免孟浪矣。行李蕭索。儻從炫然。值弟理棹將發。且值東海多事之秋。莫効齒牙。少有扶助。不知已到家否。倘家報中有聞。便示以慰懸切。舍親倪方二廣文。俱叨覆育。感激之私。時形詆字。方廣文之尊人。昔受業於弟。此其遺孤也。嗟然子立。厚重老成。生長世家。自甘淡泊。極荷老父母加意培植。乞推分時賜提命。卽弟親拜德矣。因倪舍親便附起居不恭。

與庸亭弟

咫尺高居。僅得再晤。筆墨之債。日來始了。薄暮欲一就談奉別。擬以初二日解維矣。

與曹子青

花溪促膝。芝閣銜杯。彈指已是三年。先生年力益富。德業日新。若弟心血精神。如魚

減水。坐見其竭。大不如三年前矣。去秋過吳門。趨候。知旌節已入都門。僅晤葉同初兄。得悉起居爲慰。杜蒼略遂作古人。此皆素所屬望者。業先朝露。平生故交。零落殆盡。可爲涕泗。承命以冊頁徵詩。敝邑人士。久慕風誼。勇於請教。而詩多頁少。未能廣徵。然能詩者大半在此矣。疑此冊未必如此其短。或詩人書法不善。竊自裁去耳。其間有名搢祿者。係小兒。名冠若。係小孫。名于施者。係曾孫。各勉賦一首。應命。以志通家之誼。弟老矣。與先生後會何期。此輩少壯。趨風有日。車笠相逢。陳述舊好。茲詩其張本也。因敝鄉方舍親虞律入吳。託其便叩台旌。面呈記室。虞律家世華胄。詩禮名家。其令尊有杯。久擅風雅。與虞律皆有詩。慕義久矣。惟先生進而教之。秋風乍寒。一切珍重。上祝。臨楮依依。

與韓慕廬

春間小价回。得手教。具悉近況。爲慰。弟心神筋力。與日俱衰。未知此生尙能與先生握手談諧否。徐方老今年七十。擬爲文寄之。引別詩所云。老夫幸不死。猶能待子還。再飲韓子酒。再值清秋天。許我醉紅裙。此約今更愆。方老想不怪否。然世亦豈有此

事亦弟言之博一笑而已。弟近日喜臥。佛家稱行住坐臥四威儀。但有臥耳。坐久即亦不能堪矣。飯少喜頻食。間及甘餌。皆老態也。每飯遇心有事。或聽人說話。輒便在胸腹間。非不下胃腕也。于中隔塞。但有少氣自下轉。則剝然而通。又大便艱澀不出。亦須氣轉升而始降。當是中氣衰弱。不能傳送耳。醫家皆云宜大補氣。補氣之物。談何容易。每參一錢。賣穀一石。足救弟一門四十餘口兩日之飢。其不能以老病一劑之補。換四十餘口兩日之飯。明矣。往年全收。足支半歲。連值荒旱。朝暮不保。合室嗷嗷。待哺於此老病一翁。其何以策。又諸曾孫日見長大。宜有室家。長者已踰二十。已入學矣。而尙未能婚。弟未六十見曾孫。今八十一矣。未進高祖之稱。亦餘年中怏怏事也。先生謂善飲酒是吉。不知飲時此事都忘否。古人云。酒無通夜力。事滿五更心。除非當見其醉耳。一笑一笑。此種惡趣。向人言。自嫌若有希覲。惟先生無可覲。伸紙任意。不覺其情事之縷縷而出也。果亭初度。一文爲壽。先生所喜閱者。暇時取一覽如何。初擬如期命小兒代祝。乃以訓蒙遠去。舍親方虞律。爲任此行。虞律世家子。爲密之姪孫。有才情意氣人也。久希名德。特叩門牆。惟進而教之。又舍姪勗。仍字扶升。

敝邑有名諸生。亦有名詩人也。向刻有聽雪軒集。弟爲序之。頃刻二集成。欲得先生一語爲弁。託弟轉懇。知先生筆墨不暇。請爲之代。斷可乎。希示之。

與王子喜

去冬匆匆造謁。恰值覽揆之辰。借酒上壽。主賓俱得便宜。而老祖台開閣稱觴。忽有老人星到門索醉。亦大慶快也。比夜發棹。大爲糟艘所困。不得已。易舟而還。屈指又將一年矣。爾來老態日增。精力大不如前。終夜偃臥。杖而後起。跬步維艱。望謝公高齋。邈然霄漢。不知此生更得望見故人顏色否。車馬之勞。已不克勝。舟楫安流。或可臥遊。敝居自棕江。順風張帆。兩日得達京口。金焦竹林之勝。或猶可以了夙願。踐前約。補集中詩題也。舍親何廣文遠侯。遷潤州司鐸。叨在老祖台覆育之下。同人欣慰。以老祖台政譽民望。冠絕東南。凡爲屬下。皆與有德色。遠侯慧性長才。久滯下邑。雖一甌所自甘。然無從展其驥足。亦有心斯世者。所共惜也。具眼一見。自能賞識。惟加意培植之。遠侯爲任鸞舉胞弟濯公之壻。與弟輩皆有葭莩之戚。雖籍新安。猶皖人也。仰乞造育。固不獨弟一人耳。因方虞律便附起居。虞律爲密之姪孫。與君家世好。

亦通人也。過門叩閣。促膝叙舊。當悉弟近狀。造次不宜。

與楊某

憶午秋返自吳苑。趨叩戟門。值老祖台靜攝之期。不敢瀆擾。投刺而返。乃荷格外高誼。遣使追回。開閣延見。殷殷握手。感戴如何。比約次年再至。正可從容陪付。得覽金焦兩山之勝。今秋過吳門。值老祖台攝藩篆。時事紛紜。不敢造謁。特命小价到門叩首。復蒙召至閣前。溫諭款曲。令寂寞窮途。得以自慰。弟與老祖台雖托契未深。而氣誼之孚。不減古人傾蓋。俚言寓意。存集中。用以志不忘也。今年八十一矣。桑榆已迫。瞻望無期。老祖台旦暮內召。即承特簡。旌麾所指。從此相去益遠。嚙昔部民。豈能復望見故人顏色哉。孔邇之懷。徒託諸夢中耳。念之惓然。京江一水。榮戟在望。空緘脩候。聊致屋梁之思。草野疏率。統乞鑒念。臨楮曷任依依。

復何遠候

仰止絳帷。匪伊朝夕。小兒輩時聽良誨。夢寐不忘。頃者喬遷京口。道風益振。雖南徐風物。較勝皖公。而親故依戀。何以爲懷。僕老臥江邨。跬步蹇澁。昨知駕臨龍上。不獲

扶衰走晤。一罄欲言。乃蒙雅誼殷殷。垂念陳人。旣荷手書。兼致珍貺。屬在通家。重以誠意。降拜登受。不敢自外也。銘謝銘謝。任侔行速。倚棹促答。便附數行。月內即遣役吳門。專候起居。併寄郡伯一函。此公素心耐久。自當一見深契。正不藉僕先容。然僕固不容已耳。

與吳元朗

去秋在玉峯。勞勞聚首。未悉彼我之懷。別後即有俚言爲太夫人壽。畧敘往誼。託道積轉寄當到。近履知亦佳勝。選期恐又爲新例。年翁能勉強爲之否。外吏不可爲也。舍姪孫朝夕不給。謀生無所。終年坐困。以候調選。爲之奈何。余不遠已返閩否。去歲扁舟見尋。時勢大遷。不能少爲籌畫。以紓其困。一面卽行。舟資亦未代償。至今不寧。又累諸同人資其扉履。使得遂其首丘。爲德不淺也。昨亦寄訊休寧公。問其所存。尙未見答。顧伊老今歲一氈何地。此一日不可無氈者。念之耿耿。弔龍洲墓詩。亦付道積。曾寄到否。因舍親方虞律之便。附候。虞律爲密之姪孫。乃祖直之。與尊公先生周旋最久。此子大有才氣。酷似其祖。促膝自能投分也。

與張敦復

去秋九月。于吳中東山。附致一函。併寄拙刻詩文二種。應具達到。併鑒鄙意矣。犬馬之年。忽焉八十。心血已枯。衰憊可想。而先生荷上眷益隆。乞歸無日。賜金園松竹在望。不知鄙人尙能視息以待。與先生追隨唱和否。念之惘然。今秋復因拙刻尙有未竣之工。未償之費。再至吳門。值崑岡火災。季夏殞逝。鼎盛之家。一時瓦裂。而搜求者無已。三吳有訟。必輾轉串入。望見其姓。尤以爲是。無日無詞不牽引矣。鄉里挾制。凌誅百端。適出意外。大抵皆平昔加恩之人。恩深者仇之愈甚。人情至此。謂其昆仲能一日安乎。今皆他從四去。昨過其里門。滿目蕭條。自來升沈變態。亦是尋常。未有倏忽之頃。轉眼變幻。至於此極也。偶一相見。憔悴支離。已非故我。兼以末疾浸淫。扶持步履。雖強自支撐。恐亦不久矣。形影自顧。孑然孤處。相知滿天下。到此無一可告語者。言之淚隨聲下。深可憫也。思今日古人。用情於不知之地。屈指寧有第二人哉。每述往事。感激涕零。事已至此。不祈禍解。但祈自此止耳。倘得閒偶。及直陳近狀。多年犬馬。日夕相依。知其狼狽如此。能毋少動念乎。仁人公論。無待旁啓。屬在舊交。罔有

不能已於亟切者。冒寒入城。力疾作字。附家報中。亦不敢作刺字也。統惟垂鑒萬一。

與黃平子

記三十年前。曾於長干塔寺。得挹清芬。雖未接膝深談。而屋梁顏色。至今猶在夢寐間也。每次經過貴里。輒欲停車造訪。爲同行刺促。不能獨留。未嘗不望風慨想久之。舍親何西苻。授經貴地。敝居密邇。朝夕相見。詢知起居佳勝。且知閉戶著書。剗削多種。安得縮地御風。一叩函丈。盡觀所未觀乎。念之神往。僕今年八十二矣。萬慮俱盡。惟筆墨未捐。多生積業。無計得脫。然所刻六種。板留吳門。刷本甚少。無由奉教。西苻行促。轉於坊間搜得文集一本。寄覽。兒孫輩秋後有事吳下。或得少有刷印。當覓便人又寄也。相距不及三百里。老病龍鍾。握手無期。所幸郵筒甚便。非時可接殷勤。或者兒孫秋冬之際。餬口遠出。便叩高居。又得據我情懷也。西苻臨發。便附數行。惟鑒萬一。

與張敦復

都門惜別。遂已九年。台兄名德日增。而弟生趣日減。戢影江邨。應酬都廢。欲寄長安

一書。孤廬僻處。無雁可附。以是令耶聯發。繼武木天。莫通一賀。知禮法不以責野人也。弟今年七十一矣。衰相具見。望故人如天上。何由此生再圖握手之歡。乃聞乞假返里。深幸晤言有期。昨鷁首過棕川。值弟赴秋浦之約。亟欲謀面。相去百里。驢背良苦。以何因緣更得布被論心乎。餘年寂寂。惟著述不廢。向來易學。已爲老友遺矣。頃更加刪訂。吳中當事。索付剞劂。恐又屬空言耳。詩學亦費八年苦心。五易稿矣。違小序不悖朱傳。兩家各有謬處。僭爲正之。間有發前人所未發者。安得就教高明。爲之點訂也。惟台兄篤志此事。故敢請耳。

與家价臣

獻歲佳祉與日俱升。倚杖蓬門。遙望隔江紫氣。爲額手久之。極知去冬蕭瑟。寒齋守歲。何以承北堂之懽。僕生七十餘年。未有去年之困頓窮愁也。聞文衡即臨曉上試士畢。秋浦其續矣。爾時有興。或能扁舟一覽門牆之盛。但老疾日增。出門甚艱。吳江之棹。恐亦有志未能也。奈何奈何。

寄嚴某

弟以白首餘年。重尋舊好。荷老世翁不遺簪履。忝附通家。讌集同心。暢敘往事。如夢中如隔世。迄今思之。紅燭清樽。諸謔間作。又是一夢矣。比聞尊翁先生之變。五內欲絕。疇昔故人。凋謝殆盡。至今僅存。忽焉奄逝。淒涼四顧。何以爲心。山頽木萎。古道盡矣。此又不第爲同氣悲也。隨因舍親方有懷西溪之行。附唁一函。兼申薄奠。不意有懷途中遇盜。狼狽而返。勺水微忱。竟未上達。鬱積如何。彈指三年。遂已服闋。先生業入台端行事。大有建白。蒼生共慶。不獨故人額手也。弟今年七十一矣。歎老嗟貧。平生所厭。不意身蹈此苦。破屋江邨。風雨不蔽。孫雛滿目。終歲啼飢。夙有筆墨之好。俗累攪心。此事且廢。將何以畢此生耶。先生清謙之暇。屈指故舊。亦念此菰廬中。尙有前代一老遺民否。但得置尊意中。或邀惠猶有日也。河清可俟。人壽難期。言之浩歎。敝縣父母。知係貴通家。豈弟君子也。慈惠多而果斷少。其胥吏奸猾。迥出情理之外。恐未可以德化誠感。積弊不剔。小民終不能甦也。倘書牘之便。幸爲勉之。合邑邀庇多矣。弟數年不一入城。從部民之末。供輸恐後。固不敢望見顏色也。

田間尺牘卷三終

田間尺牘卷四

桐城錢秉鐙飲光著

龍溪居士校刊

與喻武公

頃留學舍者數日。擬候駕旋。尙期造鄰。細論篇章之美。兼求大書數字。懸著江邨草堂。以爲世寵。乃聞有長林之行。恐難久待。中秋後三日。遂買舟北渡。遙見老公祖裘帷所至。滿目秋山。皆爲詩料。不知更得佳篇幾許。何時一再傾倒耶。弟甫歸家。秋潮復漲。汙邪數里。旋趁水退。薄種晚禾。復爲河伯所收。舉家四十餘口。屈指無卒歲之糧。可謂奇阨。到極困窶時。念老祖台以五馬專城之貴。鈴閣蕭然。有同素士。輒用自解耳。嘉樹苦益甚。到家即致台貺。正當其阨也。此兄生計。惟有都門一行。然資斧空乏。告急無門。不能遠出一步。惟有坐臥而已。平生感恩知己。如老祖台者。其何以策之前在郡時。知校士有期。此時應已試畢。所有知交子弟。及曾執贄於弟者。共有數人。來時晚弟列荐上懇。極知老祖台矢公矢慎。認真取士。此數子有上進之志。有可造之資。況雅意作人。當不厭恕取之也。乞推分列置之。正數額內。使弟不失前諾。卽

可拜明賜矣。專役以請。惟鑒允萬萬。翹切翹切。

與介臣弟

比在署齋。過承同氣之誼。授餐以外。百端勞擾。歸爲家人言之。咸深感戢。寂寞餘生。得附棣華之末。雖隔江猶同帶也。長公姿秉秀妙。自是金華玉殿中人。當謝紛紜。專志舉業。兼肆力於經史。鄙望非區區一時輩科名也。勉之勉之。

與楊嘉玉

奉違道誨已十餘年矣。雖問訊時通。而屋梁顏色。徒托夢想。如何如何。僕老態日增。生計日拙。近爲兒孫輩構一蝸廬。營之三載。未能落成。百費叢脞。苦趣種種。不堪爲知已道也。敝友徐君世威而比隣。篤實君子也。與弟新築衡宇相望。朝夕過從。頃以孤孫抱疴。求醫不效。老年憂苦。其何以堪。素知親翁洞垣之神。以台駕艱於遠出。不敢唐突奉請。躊躇久之。乃祖孫恩重。終不能已。特託弟爲之介紹。專役遠迓。倘推屋烏之愛。惠然命駕。或此子機緣適湊。老翁兩眼懸懸。惟望紫氣東來。以少慰其苦懷耳。

復方有懷

二十六之夜。乃得初四日手札。文理精彩。知道體已復。爲慰。不佞日衰一日。數武亦懶於移步。終日擁燭。把卷則暈。釋卷則惡。趣紛集。筆墨經旬不舉。生意可知。所難忘懷者。惟詩學易學二書。頗發前人所未發。老年心血。盡耗於此。不望行世。但求傳之其人。苦不可得。去冬徐果老付筆資。屬抄易學。荒邨中竟覓抄書人不得。頃命小兒膽出。只得一本。若寄去。遂無副本。知紀綱多能書。別錄一本。留世兄處。將來兒孫輩又可借抄。如何如何。平生著作。雖不堪傳。昨檢未刻者盈尺。亦恐終成散亂。目下病甚。亦不能親自校訂。徒付浩歎。位伯若北去。能於春間覓一晤否。有種種須面悉也。

與姚堯元

棕市言別。屈指遂十餘年。世兄以不世之才。歷非常之變。脫親危地。置身亨通。求之古人中。亦是奇男子也。欣聞佐郡漳州。此地舊爲寶玉之鄉。近爲幕府所駐。兵衡事煩。以世兄之長材。正可展其曠足。游刃有餘。早晚特擢。故人幸存。喜可知也。僕老矣。今復遠別。輒有一言。効諸左右。豪邁之概。稍宜節制。豁達之才。且暨收斂。以有司與

他職不同也。無署縣印。無務軍功。軍功事非萬全。署縣恐有沾滯。鵬程九萬里。無取速飛。忍其技癢。需時以用。此老耄不識時宜之語。惟世兄不以迂闊而棄之。僕與尊公交情。所謂相知以心。妄託骨肉於昆仲。故敢謬陳愚見。勿罪勿罪。

與魏青城

客秋於吳郡得見除目。知有湖西新命。且驚且喜。始知吾人出處進退。默有主之者。總不獲自由也。西湖分袂。忽又三載。再買吳門之棹。老病日增。不能久客。且審台端入都。遂未及相聞。自爾以來。伏枕江邨。血氣益衰。生趣且盡。居然鷄皮鶴髮翁矣。歲底一病。幾成長往。所不能去懷者。惟易學詩學兩書。三十年心血所聚。未及吾身。藉知己之力。爲之行世。又爲小孫草搆一椽。無力完葺。漂搖風雨中三年矣。簷瓦未覆。梁柱且頽。此亦一未了念也。今幸再生。僅存一息。復值里中奇荒。合門三十餘口。皆待哺於此老。吾兄其謂我何哉。頗欲附一便艇造謁。而氣息惛然。未敢遠涉。子直之來。不能同舟。咫尺江干。竟難謀面。困頓可知。犬馬之辰。避俗南來。擬隨左右上青原一禮祖庭。未識如願否。九江楊機布先生遺孤。吉水劉晉卿先生後裔。久無聞問。惟

加意亦不待囑也。寧都魏凝叔和公及彭躬庵皆此邦賢者。曾接見否。留意留意。新喻令吳茂生爲患難老友。到任七年。未通一字。見時幸致鄙私。偷得南來。草堂之資。不無少望於此君也。鄉居如井。無由見除書。或已陞遷。而僕猶作癡夢也。便附起居一切鑒念。

與吳茂生

昨承珍貺。惟有心領。既未適館。不敢當授餐也。蒙許以一枝暫寄。乃復諭令趁原船回。此不逐之逐也。士大夫交接有禮。斯禮既廢。卽不逐亦應自行矣。弟七十老翁。冒一千五百里之酷暑。訪三十餘年之舊交。不蒙倒屣之迎。竟同游客之拒。不惟無此人情。亦無此世法也。年兄前程萬里。得毋於此道。尙宜留心乎。況年兄生平履歷本末。與弟略同。弟所少者。今日一新喻令耳。豈宜作此面目相向。使弟當時蒙面干進。寧渠不博一斗大山城耶。笑笑。都門握手。重申舊好。自反無所得罪。而峻絕已甚。或有譏謔之口。以致如此耶。抑豈真以夜郎自大耶。弟半世交遊。足迹幾遍天下。到處有逢迎。不意乃困辱故人。傳之四方。亦可作一段異聞也。頃已覓舟行矣。倘未卽東

還郡中省下。或猶可從容聆教乎。

與左時匡

去冬一病。幾成長往。絕後重甦。氣息僅屬。每念越巢。如海外神山。不知此生尙能蹶履否。易學凡五易稿。今始告成。自此以後。無碍膺物矣。念通家同志。慧敏力學。足與傳此者。惟世兄一人。不佞老矣。急欲得傳。世兄亦有意乎。鄉城隔絕。縮地無法。叱馭維艱。區區此志。亦徒托之夢寐耳。然此書終當傳世也。尊翁近況如何。向來惡趣。惟當以讀書遣之。老景可惜。須亟成一書。詞賦不足事也。啓禎朝野史。家藏有本。遂手錄出。以廣見聞。不必全書。如何如何。春秋傳若藏多本。急宜留纂述。不及另啓。

與章斐庵

頃者謬承倒屣之誼。輒伸造膝之談。忘分推誠。如坐春風朗月中。深用感戢。一月以來。知公務殷繁。未敢數叩閣門。頻煩左右。而聞問間闊。疑懼交集。以老病餘生。離家數月。旅食維艱。歸思甚切。擬即叩辭台階。不知尙得望見顏色否。弟以廢棄之餘。伏處草野。諸君子謬相假借。雖稱世外野人。實從部民之列。前投賤刺。已覺非分。老公

祖復勅遣貴役持換。傳致尊意甚殷。弟不省所謂。率爾借易。平生疏忽。此見一端。然老公祖業已命之矣。諒不以疎忽而罪之也。中心悔作。至今不甯。惟鑒念萬一。臨楮悚仄不宣。

與劉衡渭

昨蒙寵召。名園雅集。可稱快事。老公祖高風爽致。一座盡傾。同是野老。忘其疏賤。慚悚何如。小詩草率應教。先錄稿呈覽。俟諸篇咸集。得大作爲之冠冕。合梓箋幘。以識一時佳會。亦勝事也。日內即擬叩辭。更望清晏之暇。一賜促膝。如何如何。

與史某

留滯貴治。忽已旬餘。細閱邑乘。居然信史。而老父母德業班班。已垂諸不朽矣。慰藉慰藉。弟冒昧遠來。荷老父母一見如舊。款洽逾分。深用感激。知公務甚殷。故不敢數叩琴堂。間有以情事挽千者。聞一概執法。亦未敢冒瀆。昨有一件事至微。於中甚費唇舌。比即繳還。不能拜惠。想蒙察照。五十年重尋舊遊。但留題數詩而去。微賜於地主已多。寧復煩安邑豬肝耶。頃已買舟返郡。即欲叩辭。恐重煩起居。敬此謝別。伏惟

覽念。

與余侄廬

頃者尾舟追隨。擬得從容。悉所欲言。不期送者載道。應酬無片刻之暇。僅再奉見而別。青雀橫江。千里絡繹。吳中父老。皆言耳目所覩。記從來無此勝事。即此一事。已足傳矣。別去惘然如失。所恃弟老矣。此生寧望再覩顏色耶。桑榆已偃。窮愁不足道。所望於故人者。平生懷抱。毫髮未申。惟少有著述。妄謂足傳。四十年心血。盡於詩易兩書。頗發先儒所未發。微言久絕。識者甚難。值知己當道之日。而不爲傳。將誰爲傳者。今四方皆知我公身任其事。旦晚可必行世矣。而弟勤懇不已者。蓋欲及吾身親見其行。且躬自校訂。恐一有淆訛。遺誤不淺。又南方剗剗既工。費亦稍省。更易以流通。正不必重耗廉藥。但金陵吳門武林數處。知交中有宦斯土者。出都時鼎言囑致。以此書付之。千秋之業。固所樂事也。又宛平相公。曾抄去易學。許爲託有力者付梓。徐立齋抄有詩學。皆係舊本。未經改定者。高誼銘最久矣。倘得兩公及健庵。大家出一隻手。衆擎尤易舉也。弟亦託陸翼士。併致三公。如何。未刻詩文稿頗多。承諭細加刪

定。將分爲兩種。可行世者爲存稿。餘爲藏稿。到家即命兒輩錄成。併莊子離騷合註。我意次第輯出。候致書敝地當事取去可也。向蒙薛公祖垂問。決不往見。但得諱郡縣。使知有田間著書老翁。爲大君子故人。或可以免胥吏之魚肉也。遊況落落。翼王能言之。不及贅聞。

與姚耕壺

汗漫之遊。遂逾半載。地主旣去。雖到處逢迎。總無實着。旅食日久。客況益困。雖鷹老爪鈍。而時事艱難。恐嘴距都無所用。從此游興倦矣。但一椽未成。百口枵腹。游飢三載。負貸如山。逃責無地。求一窮山靜舍。以避交謫之聲。不可得也。苦甚苦甚。聞溪上別業落成。徒付夢遊。近來老態備見。入城甚艱。但聞車騎下鄉。輒思把晤。咫尺蓬簞。不蒙一顧。豈鄙窮陋不足到耶。抑真恐以斗酒隻鷄累故人耶。吾老矣。足下年亦不少。餘生幾何。能不急圖聚會。

與張敦復

弟以二月東行。到吳之日。即總憲登舟之辰。倉卒寒溫。拉弟送至揚州。解囊不足以

供行李之資。再爲雲間之游。留滯三月。正值停忙。游況可想。歸裝賴有詩百首。文十餘篇。差不寂寞耳。知交中深訝安車久不北上。弟極道足下意興之倦。但恐終不能免此一出也。弟邇來老態備見。百事叢脞。忍飢閉戶。以休餘年。郭門百里。亦恐未能叱蹇。倘北發有期。尙圖力疾趨送。兼有所託耳。健庵書來。似欲弟上謁當事。此公向爲臬台時。屢承下問。要一識面。弟固以疾辭。今衰疾益甚。豈能以野服扶杖。上大公祖之庭。倘晤時談及。爲致野人銘謝之忱。但使意中知江邨有著述樂志之遺老。即陰受其炤拂多矣。固不在樞趨一見也。留意留意。便羽乞不吝金玉。爲荷。

與劉豫東

老父台以寡淡之志。沈勇之資。著循良之茂績。擢耳目之近臣。正色台班。丰裁可想。頃聞建白。議論必多。舉世方賴其道濟。屬在氣誼之末。慶幸何如。嘉樹蒙老先生久要不忘。遠來見招。而舍親亦以老先生臨歧相訂。堅辭他慕。固窮以待。此皆古人盛德事。兩君子可謂各盡東南之美。中庸獲上必先信友。而歸於誠身。即此一事。誠信具見。獲上之道。早於茲卜之矣。向在秋浦。極荷虛懷。榮發時。弟比欲祖送。面陳末議。

屬以老疾困頓。未遂此志。亦不能作書効微忱於左右。今嘉樹前來。凡弟所欲言者。嘉樹能言之矣。以先生之究心。輔以嘉樹之忠告。吾知時事正可爲也。弟生平活計。盡在交遊。今老矣。不能遠來。亦遂無以爲生。但在敝鄉舟楫可通之地。賣賦談經。亦備食之一道也。先生能留意乎。小兒向曾上調琴堂。稍能涉筆。正可作長吏將任一記室。弟不能遠出。欲資筆耕。以養餘年。亦望先生便爲留意。尺素纔通。輒以鄙私上瀆。老年情況。知已應見諒也。因舍親行迫。挑燈作訊。不詳不莊。統惟鑒念。

與房興公

奉違言笑。猶是蕪關蕭寺刻燭催詩時也。詩公和章。遂爾缺然。獨讓白頭雄耶。笑笑。自聞足下領袖台班。多所建白。朝政漸清。讜議不避。此正士君子行道之秋。誦德者言。鯁政肅然。處脂膏而不潤。此自吾人分內事。正不足爲先生譽也。向舍親江在涓言。相見拳拳。輒訊近況。頃有貴鄉劉君。亦極道高誼。繡衣持斧時。尙記菰蘆中有此一物耶。昔人謂善畫者。意到筆不到。以弟俗眼。固喜其意隨筆到耳。田間易學。前次呈覽。蒙許爲合力流傳。又有詩學一書。卷編略等。又平生雜文及詩。得盈尺許。偷得

及身見其劄劄行世。足以瞑目。足下亦有意乎。貴鄉宦吾南者。頗多好事。只煩齒頰之餘勞。一生心血。藉以不朽矣。如何如何。故人天上。野老寄訊甚難。報章不敢望。倘一下及。則貴衙門劉豫東處可寄也。便附起居。希鑒不悉。

與嚴方貽

丁巳之秋。嗜昔故人。重得聚首。華燭清樽。談讌竟夕。至今思之。又如夢寐矣。隨聞尊公先生之變。哭之失聲。平生知己。如尊公者。寧得幾人。却火洞後。交情不毀。出處雖異。此志常同。母怪弟慟之深也。嗣因舍親越遊。託附數行。併申一炷之忱。中途遇盜。狼狽而返。至今此志未達。去秋便作一函。寄徐藝初附家報中。郵致不知。曾否達覽。世翁家傳清白。古道力敦。領袖台班。自多讜論。但廉囊蕭然。長安居大不易。屬在世好。未免關情。弟今年七十二矣。日暮途窮。惟有著書自遣。搜諸敝篋。更加刪汰。計且盈尺。妄欲藉知己之力。付之剞劂。及犬馬之尚存。親自校訂。以行世。即死亦足瞑目矣。萬念俱灰。惟此一事。不能忘也。拙著田間易學。向爲尊公所留。許爲授梓。雅意未遂。弟亦重加考索。較勝前書。併有田間詩學。卷編略等。雖爲吳中當事取去。正恐銳

意吏治。無暇及此。不無望於世翁之卒成前志也。近日宦遊。頗多好事。惟須假之齒牙。足以濟事。如何。

與王子喜

發甲之際。浪迹都門。謬恃舊誼。頻登賓閣。荷太翁先生。暨伯兄相國。眷言疇昔。恕其疏狂。而諸世兄。亦以通家夙好。情殷骨肉。劫火洞然。交情不變。雲泥判絕。車笠難忘。古道在今。寧可多見。出都時。太翁手書一幀。題詩志別。情見乎詞。又勅弟作數語。爲青箱集小引。駐馬援筆。不知何語。迄今思之。都堪涕淚。弟今年七十二矣。生平故人。零落殆盡。聞太翁之變。北面長號。不獨悼喪典型。益慟身世之孤危也。徐健康入都。倚舷草率。附候伯兄。應達記室。悉此微忱。綸扉一席。海內屬望已久。人皆歎其遲。吾獨喜其老。惟老而學術益深。政事益勤。且五十登庸。正是黑頭宰相也。弟與海內屬望雖同。而情有微異。相國之德。如日光無有不被。而弟獨冀一罅之光。以急解其凍。如河潤無有不激。而弟獨祈涓滴之澤。以少濟其渴。台席之前。野人不敢以姓字屢瀕。以鄙私妄干。惟世兄昆仲閒話時。爲言前世舊遊。剩此一物。所當垂念也。憶相公

昔年留意詩學一書。欲致書貴門生。爲之授梓。此書今更加刪定。頗多創獲。雖爲吳中當事取去。恐亦無暇及此。倘蒙不忘前諾。有宦吾土者。略以齒牙及之一吹灰之力耳。此亦屬望一端也。偶閱除書。見世兄昆仲聯翩郎署。慶幸何如。不佞老而善忘。惟記得子喜世兄尊諱。去冬故作一函付健庵家郵中奉候。恐未能達也。倘諸世兄宦轍南來。吾事濟矣。望之望之。

與孫某

高堂談讌。情深同氣。分袂以來。遂已十年。音書莫達。我思如何。弟以失路老狂。舉世共棄。荷尊公先生一見。嗟歎。目爲快友。臨別時。堅留共事。比因歸志甚切。深負雅懷。知己之感。何能自己。隨聞哲人委化。北首長號。非徒悼喪典型已也。有敝鄉陳生北遊。致附一函。申此哀慟。其人小人也。從顯者游宦。委諸草莽。數年積悃。無以自達。爲之痛恨。去秋復寄一函。不知曾達否。弟老矣。後會無期。言之涕淚。令兄起居當益佳勝。尙在天津。四哥暨令姪近況如何。已皆登仕籍。弟伏處江邨。見聞都廢。相知出處。一切不知。頃因舍親赴劉侍御之招。便附數行。嘉樹至感。今之古人也。弟囑其時過。

高齋覽令先君子藏書處。知軟塵十丈中。尚有閉戶好修。如竹林金玉其人。相得甚懽可知也。

與任克家

都門分手。遂已十年。世故變更。何堪追述。即以台兄華國之選。困於三河小邑。備歷艱危。同人徒有浩歎。卒能堅忍自立。出谷遷喬。獲守名州。相知者猶以不得清華惜也。弟意吾人仕宦。必有濟於世。有利於民。如蘇子瞻召入館閣。輒請出守州郡。良有以也。磁固衝地。以台兄四應之才。當此四衝之地。非徒以盤錯別利器。正可借此練心性。進學問也。何如何如。弟伏處江介。不相問聞者已多。甲寅秋。吳燕公入都。弟附去都門數函。併未言及入三河之幕。莫寄一行。此後無從寄矣。台兄意中。猶有此方外老友耶。今年七十二矣。游興已倦。不復作漳何之夢。解推之義。惟在故人自發心耳。豈能仰要哉。嘉樹入都。赴劉侍御之招。取道花封。杯酒話舊。亦忙裏偷閑一樂事也。

與膠州牧張若騏代

歲月超忽。自老年翁高引以來。遂已二十載。每仰株山。惟有神往。得手教。且悉邱園之樂。頤養天和。探挾性奧。子弟執經。趨庭問難。東山絲竹之娛。不足道也。視弟匏繫春明。鹿鹿暮齒。豈不知棲岡之羽。俯悲樊雉。吸露之蟬。下晒蟠蚓哉。承示四書課讀本。妙義獨發。考核精詳。誠聖經之羽翼。後學之津梁也。開卷以時。習章爲易之次。乾孝弟章爲易之次。坤知行二義。確然不移。至以乾爻初九。詳言其時。潛龍勿用。言習乎其時。此論至精。非身親體認。豈易及此。弟久落塵網。斯學茫如。而欲使綴之弁語。猶以盲瞽。以瞶頌曠。誠自知其不可矣。自去夏一病。乞身未允。終日與藥裏爲生。活。近行引導之術。漸有成效。倘徹底全愈。從此息機養恬。追青驛於海上。當不棄之教外也。令郎年翁還朝。得共朝夕。藉裨良多。令親才華英妙。久深寤思。以臥病杜門。尙遲倒屣。汝南品題。應無溢詞也。方物種種。深荷遠惠。啗我海臘。餐飯爲加。謝謝。

與丁某代

獻歲春和。遙承新祉。德輝所布。遍於畿南。合鼓之聲。騰溢都下。慶慰如何。去歲舍親吳嵩。猥蒙推分。培護多方。鑣感之私。未可言罄。茲啓者。河間王郡守。弟之同梓。至交。

也。向者司馬邢臺業承翦拂。近治渤海。復荷畊矚。舍親歷任累年。皆在老年。翁覆露之下。三天久戴。欣慶可知。舍親才品素優。加以年翁表帥於上。益自砥礪竭蹶。以仰稱德意。老年翁始終玉成。當不俟弟之代請也。董先生處久深欽仰。尙遲候問。亦乞轉致鄙私。共加噓植。銜報之忱。不獨在舍親矣。恃愛率布。

與朱鶴門

自夏間拜台賜後。即爲河北之遊。中途遘疾。仍返大梁。延醫調理。歷夏徂秋。日與藥鏹爲生活。值執事鑠闕校士。未敢叩辭。秋風蕭颯。老病長途。千里孤裝。茫茫獨往。吾兄得毋有故人戀戀之誼乎。舊有行李數件。箭二枚。皆都門詩文稿。及諸公贈和之作。物雖微。不敢遺也。乞一檢付。

與江磊齋

天水固形勝之地。伯玉之都。年翁以輕裘緩帶。出入於車幘駟鐵之間。文事武備。亦儒者本分內事也。近聞烽烟俱靖。邊塞晏然。益得以吏治之暇。吊古人興廢之蹟。訪昔賢題咏之所。幕有蔣詒同聲唱和。此樂如何。至於瘡痍初復。休養實難。訟簡刑輕。

三秦賴以臥治。此又足下之本志。而贈別叙言之所爲縷縷者。固不更陳矣。別後了得詩學一書。吳會間已有抄本。未知流傳在何時耳。舊年爲徐健菴金玉約往談易。談雖未竟。乃於易理益有所得。及返江邨。取舊本重加刪訂。自謂絕學復明。老年翁鈴閣嘯詠時。亦知孤邨破屋中。尙有白頭翁閉門研經之人耶。僕老矣。雙眼益昏。跬步蹢躅。不能捨杖。兼以家口浩繁。日益窮蹙。百事叢脞。啼呼聒耳。惟有堅塞不聞。以易象消遣。古人窮愁著書。有以哉。遊道旣艱。遊興益倦。不復作隴西鸚鵡之夢。不知故人尙有戀戀之意否。訂交二十餘年。向密邇江州。樂叨河潤。准擬剖符領郡。當拜鴻賜。以爲稍頭之瓜。何意雄藩遠在隴外。不惟身不能到。即望故人一字。亦如天上瑤函。明年七十矣。後會知復何時。老年翁非薄待我者。必有以濟我之困。而娛我之老也。翹首西望。伏惟留意萬一。

與沈聖符

憶乙酉之秋。萬死餘生。顛連狼狽。吹篴無路。乞食無門。荷足下以氣誼之末。假館授餐。寢我以氈。覆我以被。使沈痾漸起。父子重甦。回首聽秋軒滿架藏書。盈階花竹。猶

宛然在目也。分袂以後。備歷艱險。雖踪跡略與少陵等。而遭際非時。從此流離天末者七年。辛卯冬。托鉢還山。空作一場遊仙夢耳。今年爲莒上之行。舟過震澤。哀妻子之喪亡。念故人之高誼。倚篷瞻望。泣涕霑襟。值陰雨迷離。同舟過往。無由登岸。一叩雲亭。中心悲戀。爲不去懷數日。偶於武林客舍。晤徐禹九兄。知係戚友。且與足下密邇柴桑。細詢起居。言之備悉。足下七十八矣。聰明強健。過於昔時。喜何可言。嘗爲釣渭者。屈指年譜。由後車之載。至鷹揚之期。殆百四五十歲也。造物富足以年。賢以過人之精力。豈偶然哉。諸郎讀古。足娛雅懷。諸孫文藻。鵲起家聲益振。耆年碩德。惟先生一人耳。弟七十六矣。衰而且廢。貧不足憂。只相隨一子。到家復死於盜。所遺三子三女。婚嫁相累。人世苦趣。寧有加耶。尙有一幼子。四孫。四曾孫。聊慰目前耳。併以附知。紙短情長。不能具悉。

與魏州來

留涉園旬日。惟州來不厭我。殷勤高誼。衰老窮途中。倍加感戴。別後汗漫。九月始抵西泠。當事雖不甚寂寞。然僕遊倦矣。於昭慶寺晤子。捉談數日。不必重過武塘矣。留

此言別不悉。孝起贈我酒一罇。留園者處。請取去以佐讀書之興。如何。

跋

丁未冬十二月。遇桐城蕭君幼孚於皖垣。幼孚爲敬孚先生哲嗣。藏書甚富。間有精本鈔本。皆手自記跋。具見先生所著類稿中。幼孚賢而好士。余因得縱觀先生之藏書。然其精本鈔本。以初交故。不敢請也。一日過幼孚案頭。見藏山閣鈔本。亟請授讀。幼孚並檢先生跋語示之。驚喜過望。田間爲勝國遺老。且受知遇於行朝。黍蠅麥蘄之思。比亭林南雷而尤爲幽深摯切。故其所著書。語多忌諱。不能推行。卽康熙二三十年間。徐氏助資雕板之田間詩文集。亦復毀去。名列違碍書目中。可覆按也。又按幼孚所藏鈔本。違碍書目有藏山閣集名。無刻本則先生跋語所云亦曾付梓。或可信也。幼孚又出示田間尺牘鈔本四卷。皆肫肫於丐資刻集。前輩疾沒世而名不稱。何如是之結心而刻骨耶。其與姜奉世書有云。藏山閣乞序。能爲拈筆否。但得數百字。畧述本末。以弁於端足矣。書固未能行世也。玩此語。又似此集未經梓行者。然窺此老專一不忘身後之名。而此集所詠歌所記載皆足以資勝國之文獻。隱然自託於杜陵詩史之林。於故君故國。惓惓然有餘懣焉。則又安肯藏之名山。託空言以自慰。

其爲刊。後被毀。無疑。故世間無印本也。此鈔本僅有先生一跋。朱墨圈點。皆先生手加。幼孚云。先生久欲校刊行世。以補正史之闕疑。余悲田間之志。而與先生保存文獻有同心。遂將此集暨尺牘。繕留副本。就商於龍潭室主。校付鉛印。以廣其傳。戊申十一月。蘧樓居士。